

Pablonun Roma Anoafu Cunu Fomani

**Jesús icoinra huafu Roma anoafu
Pablonun cunu fomani**

1 ¹⁻³Uhuun yoramishtichin, Roma anoafaoan un mato cunu fomai man tapinon. Unquian Pablo unfin Jesucristo ahun oinmatiquin. Ua catonni un afu rafumisi un inon. Upa Diosin ua nichini ahun tsain shara Furunhuunoa un yoinon. Jesús David ahun funa ini. Caiantaima Diospan tsain shara inonpacoai cuscan ahuunoa cunushonifo.

⁴Ahuunoa cununi cuscan Diospan Yoshin Sharapan ahuun curushhuunshon nocon Ifo Jesucristo maiya anoa funimani. Funimashon noco tapimani nan Diospan Furun Shara nocon Ifoan ahuamamishti huatiro. ⁵Non ahuara shara huahuunshocai Upa Diosin noco catonnima. Ahuun Furunhuunoashu nocohuun ramapaiquin noco catonni afu rafumisi inon. Noco nichini nocon caifomari non ahuun tsain yoinon ahuun Furun Cristo icoinra huanonfo. ⁶⁻⁷Upa Diosin manifoti icoinra huamapai. Mato Roma anoafori noiquin mato catonni maton chaca man shutunon Furun Jesucristo ahun yorafu man inon. Upa Diosin nocohuun ramapaiquin nocon ointi shinansharacoinon. Furun futan Apamain mato asca huashopainon.

Pablon Roma ano oinmitsai capaini

⁸Tau huaquin un mato yoisharapai. Man Jesucristo icoinra huacun

manifotiton nicamisifo. Ascacun un mato shinanquin un Jesucristohuunshon —iAichoran! Upa Diosin, —ishon un yoimisi. ⁹⁻¹⁰Upa Diosin ua yonomapaiyai cuscan un curushcain yonoshomisi ahuun tsain shara Furunhuunoa un ato yoinon. Upa Diosin ua oinquin un mato shafatifi cufishofafainaiton. Nan un cufiaiin cuscamaín Upa Diosin mato muran ua nichi huuati ishon un cufifafaini. ¹¹⁻¹²Un fasi mato oinpai mato Diosin tsain yoipaiquin. Ahuun Yoshin Sharahuunshon man icoinra huanon man yoinonansharanon Jesús tanasharashquin. Un icoinra huaino marifi man icoinra huainofin non unimanantanantiroquin.

¹³Uhuun yoramishtichin tapicahuun. Uhuun caifomari un ato Jesushuunoa yoimisi tanasharanonfo. Nanscarifi un mato huamapai. Mun catacatamisi ifiacuanano ahuara futsa huai un camisima. ¹⁴Jesús ua yona ahuunoa manifoti un yoinon. Ua yona cuscan ayamai un yoitima itiro. Ascan nantifi un yoipai. Uhuun caifomari yoifain nahuafori yoifain cunu tapiafori yoifain cunu tapiamafori un yoinon.

¹⁵Ascashori un mato tsain shara Jesushuunoa Roma anoafu yoi capaimisi.

**Nan tsain shara Jesushuunshonfin
ahuamamishti huatiroquin**

¹⁶Nan tsain shara Cristohuunoa Upa Diosin ahuun curushhuunshon icoinra

huafoti ato numatiro afu nipanonfo. Uhuun caifo Israelifoan nicaquin tauhuanifo. Natiarifi mani futsafoan nicacani Upa Dios fu nipashcaquin. Ascacufin un ranotama manifoti ahuun tsain shara un ato yoicain.¹⁷ Nan tsain sharafohuunoa Upa Diosin noco tapimana ahuuscashumain non isharatiroquin ahuun tsain tanasharashquin. Nan non Jesús Ifo huaquin tau huanitian non Upa ari caitianri nansceasi huaquin non icoingra huatiro isharacoinsquin. Diospan tsain cununi isca huaquin, —Nan Diosin aton chaca soashonafoanfin icoingra huamisifoquin, —ishon cununi.

Upa Diosin icoingra huamafo ato onaintimashqui

¹⁸ Ascafiai atirifo ascrafoma. Diosihuunoacai shinanpaicanima. Icoingra huapaicanima. Chacasi shinanmisifo. Chaca fustisi tanapaicaniquin. Diospan tsain iconcoin tapificashon nicacasmamisifo. Nantifi nanscarafosi Upa Diosin atoqui sinacoinquin. Nai muranshon ato onaintimaquin finacoinsquin.¹⁹ Upa Diosin ahuu cuscaramainquin tapipaiquifin tapicuanafquin. Upa Diosin ato shafacafi ismani.²⁰ Nantifi onihuaquin tau huanitian natianri ato shafacafi ismamisi. Mai yafi nai onihuani cuscan nantifain oinmisifo. Diosin ahuamamishti huatiro oinmisifo. Ascacun, —Uncai tapiama ahuu cuscaramain Diosiquin, —itirofoma. Nan tapiamaofin atohuun nuaquin.

²¹ Ahuunoa tapificashon yoicasmanifo. —Min nocon Diosin. Min fasi shara. Non mia noi. ¡Aicho! Min noco shara huafafainiran, —ishoncayoiyinifoma. Ascacun ahuunoa amaquiri ipaitsi shinannifo. Aton nomuran afanan ahuunoa shafacafi shinantamarocon

nisopan shinantiro cuscan shinannifo.
²² —Nonfin fasi tapisharaquin, —ifiacatan tatumashunifo.
²³ Nocon Diosincai nanacama. Ifiacashocai isca huaquin yoinifoma, —Upa Diosin, tsoa futsacai mia cuscara shara imisima. Min ahuamamishti huatiro. Non mia noiran, —ifiacashon anori yoitama ahuara futsafo rami huanifo. Na nocofunufo naashu payocofiafo nan ointsa rami huafain puiyafu rami huafain yoinafu rami huafain rono cuscarafori rami huanifo. —Nanfo nocon Diosiran, —ishon yoipaonifo.

²⁴ Ascacun Upa Diosin ato potaquin futsani aton nomuran chaca huapaiyai cuscan huanonfo. Afanancai ato numanima. Afi ranan chaca huua tanannifo futsan namanno ainfo fucashni huifaon. Ainfo fori ascarafiafano. ²⁵ Upa Diosin tsain icoingra huatama chani fusti catonnifo. Diosin nantifi onihuani. Nan Diosicai cufitama nan onihuafu cufinifo. Ascatama Diosin shararan ishon yoipacupainonfo.

²⁶ Ascacufin aton nomuran chaca huapaiyafioan tapishon Upa Diosin ato potani. Afanan ato numanima. Upa Diosin noco onihua cuscan nocofunu ainfo ya icaino ainfo fori nocofunu ya inonfo. Ascatarocon ainfo fori afiran fuchinanpaicani. Aforanansi iquinannifo. Chaca huatanannifo.

²⁷ Nanscarifiai nocofunu ainfo tanatama afi ranan iquinanpaicani. Ascashu chaca huantanancatan aton nomuran aton cayari omitsisa huapaonifo.

²⁸ Ascataro Upa Dios onanpainifoma amaqui inifo. Ascacurifi arifi ato potani aton nomuran afiran shinanpaiaifo cuscan chaca huan tananonfo. ²⁹ Chaca fustisi shinancani chaca huan tananonfo

aton ahuinma ya icaifoanno ainfofori ato funumafo yari ipaonifo. Aton namari fipaifain. Fasi chacafon icain mafo noirimisi icain futsafoqui shinanchacamisifo icain fashimitsamisifo icain rutumitsamisifo icain fochishmanantanancatan sinai si fuyamisifo icain paramitsafoanfafainmisifo icain noimati huamitsamisifo icain yoiti huamitsamisifo icain³⁰ futsafo yoiti huafain Dios noicasmafain roanmitsamisifo icain cacapaimisifo icain aton nomuran chaca fustisi shinamisifo icain aton apa yafi ahua nicacasmafain³¹ ahuara shara shinapaimisifoma icain tsoashtacai ato icoingra huatirofoma icain tsoanshtahuun noiyamacain chaca huapaimisifo icain rauhuaquin tapiamafo icain tsoanshtahuuncai ramapaimisifoma icain.³² Upa Diosin ahuun tsain shara yoiquin isca huani, —Futsafoan ascaran chaca huaiton un ato namairan, —ishon. Yoini cuscan man tapifiacashon aton chaca shatupainifoma. Ascarifiatan futsafoanri nan acaifo cuscan huaifoan oincaquin, —iAichoran! Nanscarocon chaca huatanacahuun, —ato huanifo.

Upa Diosin ato iconquin onaintimai

2 ¹Ascano man shinanraca, —Nan cuscara yora fasi chacacoin. Upa Diosin main ato onaintimapainonran, —ifiashon marifi man asca huamisiquin. Ascashu, mafiri man yoimui cuscaracoin. Matori onaintimatiro. ²Nan non ahuara chaca huamisi cuscan nantifi Upa Diosin man tapicoian. Ascan man non tapian nan chaca huamisifo iconcoin ato onaintimai.

³Mancai Diosin cuscarama. Marifi man nocofunufiashon man yoiquin isca huamisi, —Nan chaca huamisifomain

Upa Diosin ato onaintimapainonran, —ifiashon marifi man asca huamisi. ¿Ascacun man shinanmun Upa Diosin matori onaintimaimaquin? ⁴Upa Diosin matohun noiquicai mato funa ahusca huarima. Man chaca huafaiton mato shara huafafaini. Mato funa onaintimaima. ¿Man tapiamamun matohun ramapaiquin maton chaca shatumapai man tanasharanon? ¿Nanfohuunoamun man shinanpaimacai? ¿Diosiqui man ointi mutoimun?

⁵Upa Diosin mato shara huafaintocai man shinan futsapaima maton chaca shatushquin. Diosquiricai man shinanmisima. Man chaca huaa cuscan Upa Diosin ointiaquimaima. Ascan chaca huaquin man unuyamaiton Diosin sinaitian mato onaintimashqui. ⁶Upa Diosin nan niyoshon amisifo cuscan atoti inanpacushquin. ⁷Nan tsoaran Diosin ato imapaiyai cuscan amisiton futsafo shara huafafaini tsain shara Upa Diosin atohuunoa yoisharaiton nicapaicani. Isca huaquin, —iAicho! Un mia yinoa cuscan min amisi. Un miqui unimai. Min ufu ipasharatiroran, —ishon nicapaicani. Afu ipashquin. Nan cuscarafo Upa Diosin aya ato imapacunaca. ⁸Ascifiata ratoranfoan afi apaiyai cuscan fusti shinainfoan aton nomuran fucash huamisifo icain Diospan tsain iconcoin tanatama ahuara chacafosi tanaifoan. Nan cuscarafoqui Upa Diosin ahuun nomuran sinacoinquin ato onaintimashqui. ⁹Nan ratoran futsa Israelifo iyamarai mani futsafoan chaca huamishaquin fasi aton nomuran omitsiscai finacoinshecani. ¹⁰Ascacun ratoran futsa sharamisicun Diosin sharapan ato yoishquin, —Mian nicamisicun. Un miqui unimairan, —ishon ato yoishquin. Aton nomuran unimacaquin ahua fucash huanonfoma.

Israelifo iyamarai mani futsafo isharaifoan Upa Diosin ato shara huaiquin.¹¹ Ascacun Diospan nantifi noco nanscarafosi oin.

¹²⁻¹⁵Nantifiton chaca huamisicun ato onaintimashqui. Uhuun caifo Israelifoanma atirifiton Upa Diosin tsainquin cununifo cuscan oinyamafiamisishaquin ahuara shara aton nomuran tapiro. Tapifiacashon shara huamisifoma. Chaca huafiacatan aton nomuran shinanquin isca huamisifo, —Un chaca huaran, —iyamarai, —Uncai chaca huamaran, —ishon shinancani. Ascacun chaca huaifoan ato onaintimashqui. Ascashu omitsiscapanacafu muran foschani. Ascan uhuun caifo Israelifoan Upa Diosin yononi cuscan noco cunushoni cuscan non aya. Tsoan man tapifiashon chaca huaiton nan yononi cuscan huakin ato onaintimaina nan omitsiscapanacafu muran foschani. Diosin tsain cununi cuscan nicafashucui ascacoianfoma ato imasharanon. Ascano Diosin yononi cuscain ato yoishquin, —Min shararan, —ishon ato yoishquin.¹⁶ Nantifain aton nomuran shinanmisifo cuscan Upa Diosin tapicoian. Nan shinanmisifo cuscan fomanfiainfoan nocon Ifoan nantifi ato puashoshquin. Upa Diosin ahuan Furun Jesucristohuunshon ato onaintimashqui. Nannori Diospan tsain sharahuunoa un mato yoi.

Diosin yononi cuscan Moisés Israelifo tapimani

¹⁷Uhuun yoramishtichin, Upa Diosin yononi cuscan noco cunushopaoni. Nan noco cunushonicun man shinanraca, —Upa Diosin non Israeli noco fusti catonni futsafocai catonnima. Non fustifin ahuan yoraquin, —ishon man shinanmisiquin.¹⁸ Mato amapaiyai

cuscan man man tapia. Tapimamisifoan ahuun tsain mato tapimana. Ascan ahuara shara nicashon, —Iconran, —ishon man yoimisi.

¹⁹Man yoiquiri isca huaquin, —Nocon caifoma fusho cuscarafo. Ahuuscashomain Diosin tsain tanasharatiroquin tapirofoma. Nonfin ato tapimatiroquin. Faquish muran ica shinantsa aafu. Nonfin chashamat cuscara ato chashashotiroquin Dioshuunoa tapinonfo.²⁰ Upa Diosin noco yononi cuscan iconcoin. Ahuun tsainhuunshon non tapicoian. Ascacun tsoa futsacai tapiataima aton chaca shatushcaquin non aton facufo ya tapimatiroran, —ishon man shinamisi.

²¹Man futsafo tapimamisi ¿Ahuuscain mafiri man tapimamuimanmun? Futsafo man yosimisi, —Ahua onuyamacahuun, —man huamisi. ¿Marifimun man onumisima?²² Maton ahuinma fu iyamacahuun. Maton funuma furi iyamacahuun, —man ato huamisi. ¿Ascafashu marifi maton ahuinma fu man icamun? —Ascan Diosicoimma cufiyamacahuun. Dios fusti noicoincahuun, —man ato huamisi. ¿Manmun Upa Dios fusti tanacoinci?²³⁻²⁴ Upa Diosin noco yononi cuscan man non tapicoian, —nan cacapaimisi cuscara man tsainfafaini. Man futsafo yoifiatacái marifi Diosin yononi cuscan man aimá. Ascan matohuunshon nocon caifomafoan yoiquin isca huamisifo, —Diosin ahuan yorafocai isharafoma. Ascan arifcái sharamaran, —ishon yoimisifo. Ascan matohuunshon Dios chaca huafo. Nannorifi Diospan tsainquin cununi.

²⁵Upa Diosin noco yononi cuscan non aafin nan Israeli sharafo cuscara noco imatiroquin. Ascafia noco yononi cuscan ayamashu nan yora chaca cuscarafo non itiro.²⁶ Yora futsafo

Diosin yononi cuscan amisicun Upa
 Diosin noco shara huashopaiyai cuscan
 atorifi shara huashotiro. Noco
 inanpaiyai cuscari atori inanshquin.
²⁷Nanfo Israelifomafiaflashon Diosin tsain
 nicasharacoincani. Manfin Israelifoquin.
 Diosin mato yononi cuscan
 tapicoinfoishu man yoitimamisi. Ascan
 nanfo isharafiaainocai man
 isharamisima.

²⁸Diospan yoracoinin ahuun tsain
 tanasharatiro. Nanfomin
 Israelicoinfoquin. Futsafo Israelicoinfo
 Cainfianishaquin Diosin yononi
 cuscacoin acanima. Afocai Diospan
 yoracoinfoma. Ascafiaishucui
 Israelifocoinma. Nocon fuyamisi cuscara
 furonanfacu rama caian non foshqui
 rupa shatumisi. Ascan tapitirofo nanfo
 Israelico. Ascafia noco yononi cuscan
 non ato foshqui rupa shatufiacai ahuun
 tsain icoingra huafomacai Diospan yora
 itirofoma. ²⁹Diospan Yoshin
 Sharahuunoashu nocon nomuran
 fiananantiro non Diosiquiri
 shinansharanon. Ascashu Diospan
 yoracoin iishquin. Non ascaino yorafao
 nocohuunoa yoisharayamafiaino Upa
 Diosin nocohuunoa yoisharashquin.

3 ¹Ascan nonfin Israeliri cainniquin.
3 Ascan non ahuaraya cuscacai
 futsafo ayama. ¿Non amisi cuscan
 nocon facufo non aton foshqui rupa
 shatuanomun shara itiro? Ainfain.
²Uhuun yoramishtichin, shinancapon.
 Upa Diosin manifoti yoipaiyai cuscan
 nocon caifo yoiqui tau huani. Noco
 tapimani cuscari non mani futsafori
 tapimanon.

³Icon, atirifi nocon caifocai Upa
 Diosin yononi cuscacoin acanima.
 ¿Icoingra huayamafiaflashon Upa Diosin
 noco yoini cuscumun noco ashoomacai?
⁴Ma. Ascapacunacama. Nantifi yorafao
 noco paratirofiancui Upa Diosin noco

parapacunacama. Nanfin iconcoin
 fustiquin. David cunuquin isca huani,
 "Yorafoan Upa Diosin tsain icoingra
 huayamafiaflashon ahuun tsain
 cayacafi iconcoin manifoti ato
 tapimashcaniran,"
 ishon cununi.

⁵Futsan shinanquiraca, —Upa Dios
 fustifin sharaquin. Noncái ascaranma.
 Ascan non chaca huaiton futsafoan noco
 oinquin Upa Dios noco cuscarama aafin
 sharacoinquin. Ascan tapitirofo Upa
 Dios mimacai sharacoincun. Nocon
 chacahuunshon futsan tapitirofo Upa
 Dios sharacoincun. Diosincai iconquin noco
 onaintimatiromaran, —ishon anori
 shinantirofoquin. ⁶iOhua! Fasi amaquri
 shinancani. Upa Diosicai non chaca
 huaa cuscan ointiaquimatiroma. Non
 chaca huafaiton Upa Diosin noco
 onaintimayamaitocai ahuuscashon non
 tapitirofa afananasca huashquima.
 Diosin chacafo onaitimayamaino
 ahuuscashomain yorafoti yoitiroquin
 afu ipayamarain omitsiscapanacafó
 muran focanicai.

⁷Ascan futsafoanraca shinancani, —Un
 chani yoimisicun futsafoan tapitirofo
 Upa Diosin iconcoin fusti yoimisi. "Upa
 Diosin sharacoinran," ishon yoishcani.
 Ascan uhuun chanihuunshon futsafoan
 mima huaquin Diosochnoa
 shinansharashcani ⁸Ascan ahuuscain,
 "Min chaca huamisicun un mia
 onaintimairan," ua Diosin huatiromun?
 —Nannori man shinanraca. ⁸Nan
 cuscara yorafao fasi amaquri chaca
 shinanpaicani. Isca huaqui yoipai,
 —Non chaca huanoncahuun. Ascan
 Diosochnoa shinansharatirofoquin,
 —ishon yoipaicani. —Pablunri anori
 yoimisiran, —ishon yoicani.
 Chanimisifo. Uncai anori yoimisima.
 Upa Diosin iconquin na cuscarafo
 onaintimashqui.

Tsoa futsacai non isharamisima

⁹Ascan yora futsafo chacafiaino noncái ato cuscaramamun? ¿Norus fustumun non shara? Ma. Anorima. Un mato tapima cuscan nantifi yorafocai nocon caiformafoan norifi non Israelifoanri man non chaca huamisi. ¹⁰Nunorifi Diosin tsain cunuquin isca huaniquin,

“Diosin nocó yononi cuscacai tsoashta amisima. ¹¹Diosin nocó yononi cuscan tsoancai tapicoinmisima. Mancaí Upa Dios onanpaicoínma nocó yononi cuscan tapishquin. ¹²Manifoti anoafaoan Upa Dios cachiquiri huaafó ato isharamapaiyai cuscan atamarocon chacacoín tapiáfo. Tsoacai shara tapimisima. Tsoa fusticai isharamisima. ¹³Yora naacun mai huashon non fupuaino pisin tohuutiro cuscan nanscarifiai aton ashfan muranshon tsain fasi chacacoín yoimisifo. Nan rono paupaton nocó nasa non mutiro cuscan aton tsainmanri nocó omitsiscamatiro. ¹⁴Roanmitsamisifo icain tsain isininpator yoimisifo. ¹⁵Samamashta yora rututirofo. ¹⁶Nan cahuancacainaítishon yora chaca huafoanfafainmisi ato omitsisca huafoanfafainmisi. ¹⁷Diosin nocón ointi shinansharamapaiyai cuscacai afoan mumisima. ¹⁸Dioshuunoa shinammisifoma. ‘Aacai ahuamaran,’ ishon shinammisifo. Aquicai ratucanima,” ishon Diosin tsain inopacoai cuscan yoimisifoan cununi.

¹⁹Man non tapia Upa Diosin yononi cuscan Moisés nocó cunushoni. Noco yononi non chaca huanonma. Noco yononi cuscacai non amisima. Ascan

tsoancai yoitiroma isca huaquin, —Diosin yononi cuscan un amisiran, —ishoncái yoitiroma. Iconquin nantifi nocó onaintimatiro. ²⁰Ascacucai Upa Diosin tsohuunoa yoitiroma isca huaquin, —Un mato yononi cuscan man amisi. Man ahua chaca huamisimaran, —nocó huatiroma. Diosin nocó yononi cuscan man non tapicoinfashion nanhuunshon non shinantiro, —¡Ohua! Upa Diosin yononi cuscacoincái un amisima. Urifi un chaca huamisiran, —ishon non shinantiro.

Jesús icoinra huaashu non Dios fu ipatiro

²¹⁻²²Upa Diosin nocó yononi cuscan Moisés nocó cunushoni. Noco cunushoni cuscan non apaifiai non itiroma Diospan yora iishquin. Ascafia ahuuscashomain nocon chaca nocó soashotiroquin a cuscara shara non inon Upa Diosin natian nocó tapimana. Nannori Moisés yafi Diospan tsain yoimisi futsafoanri cununifo. Ratoranfo nocon caifo Israelifo iyamarai nocon caiforma non Jesucristo icoinra huacun nocon chaca nocó soashotiro a cuscara nocó imasharashquin. ²³Manifoti anoafaoan nantifain man non chaca huamisi. Upa Diosin nocó imapaíyai cuscacai tsoa acoinmisima.

²⁴Ascafia cu Jesús Cristo nocó nashoni nocon chaca soashoshquin. Non icoinra huacun afanan chaca nocon ifo itama Jesús Cristo acoin nocon Ifo inon. Non ahuara shara huahuunshoneai nocó numanima. Ahuun Furunhuunshon nocohuun noiquin nocó numani.

²⁵Ahua chacacai Upa Dios fu itiroma. Ascan Furun nichini nococairocon onaintimatama Furun onaintimani nocohuunoashu nashon nocon chaca soashonon. Ascan ahuun imi foyanan nocó nashoni non icoinra huaiton Upa Diosin nocó onaintimaima. Ascan Furumun nocó nashoantaima iyopaonifoanri chaca huapaonifo cuscan. Tapiyonifo chipo

Furun atohuunoashuri nashquiai. Ascano icoingra huaoan aton chaca iconquin Furunhuunshon soashotiro afori afu ipanono.²⁶ Natianri Diosin ato ismapai chaca huafiamisishaquin Jesús icoingra huacun ahuun yorafo ato imatiro. Man raca shinain,—¿Ahuuscain chaca huamisifo ato onaintimama Upa Dios fu ipatirofomun? —ishonraca shinancaniquin. Anorimafinquin. Furumun ato nashoni aton chaca soashoshquin. Ascan nan icoingra huacatan Upa Dios fu ipatirofo. Iconquin ahuun yorafo ato imatiro.

²⁷⁻²⁸ Non ahuara shara huahuunshoncái nocon chaca noco soashonima. ¿Ascan tsoancai yoitiroma isca huaquin? —Upa Diosin noco yononi cuscan un nantifi amisi. Ascacufin un afu ipatiroquin, —ishon tsoancai anori yoitiroma. Ascarafa shinainno cacapaimisi itiro. Upa Diosin noco yononi cuscan non nicamisihuunshocai noco numanima. Furun icoingra huaiton noco numatiro. Nannori non mato yoimisi.²⁹ ¿Upa Dios nocon caifo Israelifoan nocon Dios fustimun? Ma. Caifo futsanfoanri aton Diosiri.

³⁰ Upa Diosin noco nanscarasi huai. Nocon caifo yafi nocon caifomari Jesús icoingra huaiton nocon chaca noco soashotiro afanan noco chacahuunoa shinanonma.³¹ ¿Ascano non Jesús icoingra huacun Diosin Moiséhuunshon noco yononi cuscan non yopaimamun cununi cuscan aquin? Ascatama non Jesús icoingra huaiton Upa Diosin noco yononi cuscan non atiro. Jesuhuunshon fusti non atiro.

Abrahamhuunoa Pablo noco ahuara futsa tapimani

4 ¹⁻² Ascatan natian un nocon shuni Abrahamhuunoa mato yoi. ¿Diosin yononi cuscan aimun ahuun chaca soashoni sharacoin inon? Ma. Anorima.

Abraham asca huaiton yoicuana, —Unfin Diosin yononi cuscan un amisiquin, —ishon yoicuana. Ascafashu nanoricai yoimisisima. Upa Diosin ahuun ointaificai ascatiroma.³ Ahuunoa Diospan tsain cununi isca huaquin, —Abraham Upa Dios icoingra huamisi. Ascaino Upa Diosin ahuun chaca soashona a cuscara isharanon, —ishon cununi.

⁴⁻⁵ Non yonoaino ifoan noco cashman inainma. Noco nifishon noco inantiro. Nanscarifiai non ahuara shara huatiroma Upa Diosin noco nifinon nocon chaca noco soashonon non afu ipanon. Nonfin chaca huamisifoquin. Ascafashon non Jesús icoingra huacun Upa Diosin noco yoishquin, —Un maton chaca soashona. Man uhuun facuhuunoashu isharanon, —ishon noco yoishquin. ⁶ Nannori nocon shuni David yoini. Noncái ahua shara huatiroma Upa Diosin noco unimamanon. Afin noco yoitiro, —Un min chaca mia soashona. Ascan min ua cuscara shara iquiran, —ishon noco yoiaino non unimatiro. ⁷ David isca huaquin yoini,

“Tsoan ahuun chacafo Upan Diosin rau huua afanan afohuunoa shinanyamaino fasi unimatiro.

⁸ ¡Aicho! Upa Diosin isca huaquin yoishquin, ‘Min chaca huua cuscan un afohuunoa afanan shinanpacunacama. Natian min chaca huamisima cuscara min itiroran,’ ishon yoiaino fasi unimacointiro,”

ishon David yoini.

⁹ ¿Upa Diosin Israelifo fusti unimamatiromun? Ma. Israelirifomari aton chaca soashotiro a cuscara shara imashquin. Abraham Diosin icoingra huacun ahuun chaca soashona a cuscara shara imashquin. Nannori non mato yoimisi.¹⁰ Foshqui rupa shatuataima

ahuun chaca soashoni a cuscara shara imashquin. ¹¹Abraham foshqui rupa shatuataima Upa Dios icoinra huaqui tau huani. Ascacun ahuun chaca soashoni a cuscara shara inon.

Ascaino chipo fari ranan finoanno Upa Diosin Abraham yononi, —Min non min yorafori foshqui rupa shatucahuun. Nan foshqui rupa shatushonfin min shinantiro isca huaquin, “Icon Upa Dios un icoinra huacun uhuun chaca ua soashona ua shara huapanaca Upa Diosin ua yoiyoniran,” —ishon Diosin Abraham shinanmani. Ascacufin tsoafo foshqui rupa shatuataima Dios icoinra huashu Abraham ahuun upa cuscara itiro. Afin foshqui rupa shatuataima Upa Dios icoinra huaquin tau huani. Ascacun ahuun chaca soashoni a cuscara shara inon. ¹²Foshqui rupa shatuafori Abraham cuscara itirofoquin. Aafin foshqui rupa shatuataima Dios icoinra huaniquin. Afoanri arifi Jesús icoinra huacanashu Diospan yora itirofoquin. Ascan Abraham aton upa cascarari itiro.

Abraham Diosin yoiyoni cuscan icoinra huashon ahuunoa fini

¹³Upa Diosin Abraham yoini isca huaquin, —Min non min funafori nan maitio un mato inannon matonna inon, —ishon yoiyoni. Upa Diosin icoinra huacun aton chaca soashona a cuscara shara inonfo. Ascacufin ato yoiyoni cuscan ato inanshquin. ¹⁴Futsafoan icoinra huayamafiashon shinanquin isca huaa, —Diosin yononi cuscan un aiton uqui unimatiro noco inanpaiyai cuscan ua inanshquiran, —ishon shinantirofo. Nanfo Diosin yoiyotiani cuscan fiaino non ipaitsi icoinra huaa. ¹⁵Ascafiaicai anorima. Diosin noco yonoyamaino tsoacai yoitima icuanamafinquin. Ascafia noco yononi cuscan apaafiaicai

tsoa ascamisima. Diosin chacafoqui sinai yoitimamisifo onaintimashqui.

¹⁶Ascan non ahuara shara huaacuca Upa Diosin noco yoiyotiani cuscan noco inainma. Non icoinra huaiton noco cashman inanshquin. Ascan nan Israelifo yononi cuscan tanaifo iyamarai nan tanaifoanmari Upa Dios icoinra huacanashu ahuun yorafo itirofo. Ato yoiyotiani cuscan cashman inanon. Abraham icoinra huani cuscan afoanri icoinra huashu ahuun funafo cuscara itirofo. ¹⁷Nannori Diosin tsain cunushoni isca huaquin, —Manifoti min aton upa cuscara. Un mia imashquinran, —ishon Upa Diosin Abraham yoiyoni. Abraham tau huaquin Upa Dios icoinra huani. Ascan norifi non chipo icoinra huashu nocon upa cuscara itiroquin. Upa Diosin noco oin non Abraham ahuun facufo cuscara. Diosin yora nacun funimatiro ninon. Icataima rufofo Upa Diosin yoiqui tau huani.

¹⁸Ascano Abraham anifoshta afanan facu atiromafiashon Dios icoinra huaacun. —Min chipo facu yashquin. Min funafori ichaparasi cainshquiran, —ishon Upa Diosin yoiyoni cuscan icoinra huani. Ascan yora ichapaoan aton upa cuscara ica. ¹⁹Tapini anifoshtacoin cien fari aqui caa. Ahuin Sararifi noventa fari aqui caa afananricai facu nanutiroma. Ascan man tapifiashon Diosin yoiyoni cuscan icoinra huani. Icoinra huua cuscacai afanan amaqui ipainima.

²⁰⁻²¹—Un anifocoinno uhuun ahuinri yoshafofiashon Upa Diosin ua yoiyoni cuscan ua facu inantiroran, —ishon shinanni. Mimacaiquin icoinra huani. —iAicho! Upa Diosin, mian yoiyoni cuscan mian inanshquin. Min curushhuunshon mian yoiyoni cuscan mian ashottiroran, —ishon yoini.

²²Icoinra huaiton Upa Diosin ahuun

chaca soashoni a cuscara shara inon.
23-24Upa Diosin tsain yoini isca huaquin,
 —Abraham Upa Dios icoinra huani.
 Icoinra huahuunshon ahuun chaca
 soashoniran, —ishon cununi. Abraham
 fustihuunshocai cununima. Norifi nan
 icoinra huafoti noco cunushoni. Nocon
 Ifo Jesús naacoinfiacun Upa Diosin
 funimani nipanon. Nan non icoinra
 huaiton nocon chacari noco soashonon
 a cuscara shara non inon.

25Nocon Ifo Jesús namani nocon
 chaca noco soashonon. Nantori
 funimani Upa Diosin noco rau huanon a
 cuscara shara non iishquin.

Tsoan nocooqui patatiroma

5 **1**Upa Diosin nocon Ifon
 Jesucristohuunshon noco rau huua
 nocomaqui afanan iquima no fu
 ipashquin. Ascano nan icoinra huashu
 non afu isharapacutiro. **2**Non icoinra
 huacun Upa Diosin noco noiaino non
 afu shafatifi rafutiro. Ascano
 unimacoinquin non tapitiro noco
 imapaifyai cuscan shara non atiro.

3Ascatari non Jesuhuunoashu
 omitsiscafiaquin non shinanchacaquia
 Jesús tununi cuscan non tunucointiro.
 Ascatan non unimatiro. **4**Non tunuaino
 Upa Diosin nocooqui unimatiro non Jesús
 cuscara isharashquin. Non isharaquin non
 tapitiro non chipo afu ipasharashquin.
5Upa Diosin ahuun Yoshin Shara nocooqui
 nichini. Ahuunshon non tapitiro noco fasi
 noicoin. Nan tapishocai non
 shinanchacatiroma. Noncái iscatiroma,
 —¡Ohuashta! Un ipaitsi Jesuhuunoashu
 un omitsisca. Ua yoiyoni cuscan ua
 ashoshquimaran, —ishoncái non anori
 shinantiroma.

6Shinancapon. Noncái ahuuscashon
 nocon chaca soatiroma Upa Dios cuscara
 isharashquin. Non ascara chaca icaino
 nantianri Cristo oni noco nashoshquin.

7Non isharafatiro tsoan noco
 nashotiro. Itsairaca yora
 sharahuunoashu fustirasi noco nashotiro.
8Ascafiaquin non Diosquiri chaca
 huafainton nantianri Cristo
 nocohuunoashu nani. Ascano Upa Diosin
 noco ismani fasi nocohuun noicoinquin.

9Ahuun imi foyanan Criston noco
 nashoni Upa Diosin noco rau huanon a
 cuscara shara non inon. Ascacun icoinra
 huamafoqui Upa Diosin sinaquin ato
 onaintimaitian noco mimacai huakin
 numashqui non omitsiscapanacafo
 muran canonma. **10**Non Upa Dios
 noicasmayopaonitian Furunmun noco
 nashoni noco humano non afu ipanon.
 Natian Jesús niahuunshon mima
 huakin noco numanon Upa Dios fu
 non ipasharanon. **11**Ascano natian
 nocon Ifo Jesucristo noco Apa Dios ya
 imapacushquin non ahuunoashu
 unimacoinon.

Adán yafi Cristo

12Ascatan tapicahuun. Adán chaca
 huaki tau huani. Chacahuunoashu
 nani. Ascacufin ahuunshon nantifi
 manifotifain chaca huamisifoquin.
 Ascano nantifi nai futsushquin.

13Moiséshuunshon Upa Diosin yorafo
 yonoataima nantifi manifotí anoaofoan
 chaca huapaonifo. Moisés yononi cuscan
 tapishoma Diosin nanfohuunshoncái ato
 onaintimanima nannonfo. **14**Ascafiaquin
 Adán niyopaonitian non Moiséstianri
 yorafoti nai futsunifo. Upa Diosin Adán
 yonofia nicayosmani chaca huani. Adán
 Dios chaca huani cuscan futsafoan
 huayamafiacanashu nai futsunifo. Adán
 onihuaquin tau huani. Chipo Cristo arifi
 mai ano oni Adán cuscara nocofunu
 ishquin. Ascafialeshucái Adán
 cuscara coinma.

15Nan nocofunu Adán ahuun
 chacahuunoashu nantifi yorafo nai

futsucani. Ascan nan nocofunun Jesucristo fusticai ascanima. Ahuunshon yorafohuun ramapaiquin Upa Diosin ato rau huatiro aton chaca soashquin.¹⁶ Adán chaca huaahuunshon Upa Diosin nantifi namaqui futsai. Ascafia Cristohuunshon aton chaca soashotiro natamarocon afu isharapacunonfo.¹⁷ Adán ahuun chaca fustihuunoashu nantifi namisiffo mimacaiquin Jesucristo fustihuunshon Upa Diosin noco rau huatiro. Noco rauhuano non afu ipasharanon a cuscara shara iishquin.

¹⁸ Ascano Adán chaca huanihuunoashu fusti nantifi namisifo. Nanscarifiai Jesús ahuun sharahuunoashu fusti nantifi aton chaca soashotiro ato omitsisca huatamarocon ato nimapacunon.¹⁹ Nan nocofunun Adán Diosin nicacasmaquin tau huanino ahuunshon chaca huapamisifo. Nanscarifiai nan nocofunun Jesucristo fusti Apan yoini cuscain. Ascano Apa nicacoinshon ahuunshon yora ichapa imasharatiro Apa fu ipanonfo.

²⁰ Upa Diosin yorafo yonopaiyai cuscan Moisés cunushoni a chaca huamisifo cuscan tapinonfo. Nanhuunshon non tapitiro non fasi chaca huamisi. Mimacaiquin non tapitiro Upa Diosin nocohuun ramapaiquin noco rau huatiro nocon chaca soashoshquin.²¹ Ipaomi chaca fustisi yorafoan aton ifo icaino ato namaquin futsani. Ascafia什 natian Upa Diosin nocohuun ramapaiyaino nocon Ifo itiro. Nocon Ifo Jesucristohuunshon nocon chaca noco soashotiro a cuscara shara non inon afu ipashquin.

Non Cristo fu nani cuscaracon afan chaca nocon ifo inonma Cristo nishon nocori nimapacunon

6 ¹ Ascan atirifoanraca shinanquin isca huacaniquin, —Non chaca huafafainfiaioraca Upa Diosin nocohuun ramapaiquin. Nocon chaca

noco soashonaran, —ishon amaquiri shinanmisifo. ² ¡Ai timafin! Ascayamapacushapainonran. Jesús noco nashoni nocon chaca afanan nocon ifo inonma. Yoran nashocai afanan futsa nicatiroma a furicai afanan rafutiroma. Futsan ahuun iforicai itiroma. Nanscarifiai non Jesús fu naa cuscaracon chaca afanan nocon ifo inonma.³ Man tapiamamun man nonfin unu muran iquimamuquin Jesucristo ahuun yorashon ato oinmashquin? Ascacun Jesús noco nashoni nocon chaca soashoshquin. Norifi afu naa cuscaraconshon non afanan chaca huanonma.⁴ Ascano Jesús maini cuscan norifi non chaca huapaoni afu nani cuscaracon. Ascashon Upa Diosin ahuun curushhuunshon Furun funimani afu ipasharanon. Nanscarifi aqui nocorifi funini cuscaracon non afu ipasharanon non chaca huapaoni cuscan afanan non anonma.

⁵ Naino non ahuun yoracoin ini afu yora fusti cuscara iishquin. Nacun afincoin funimani isharapacunon. Norifi ahuun yoracoianshu a cuscara funa shara non itiro.⁶ Jesús mastaifono norifi afu masta cuscaracon. Non chaca huapaoni cuscan cuyonon. Non Jesús ifoataima chaca nocon ifo ipaoni. Non afu masta cuscaracon afanan chaca nocon ifo inonma.⁷ Shinancapon. Tsoan nashocai afanan chaca huapaitiroma. Marifi Jesús fu naa cuscaraconshocai man afanan chaca huapishquima. Afanan chacapan mato yonotiroma mato chaca huamapaiyai cuscan anonma.

⁸ Non Cristo fu naa cuscaraconshon non icoinra huashu non afu ipasharatiro. Nanri non icoinra huai.

⁹ Man non tapia iconcoin Cristo funimani afanan nanonma. Ahuashtatocai afanan Cristo

namatiroma. Ahuun ifo itiroma afanan namanonma. ¹⁰Nai fustinishaquin nocon chaca noco soashoni afanan chaca nocon ifo inonma. Ascano natian Apa Dios fu isharapacunaca.

¹¹Nanscarifi aquin natian man shinantiro isca huaquin, —Un chaca ipaoni cuscan man cuyo. Afanan ua ahuisca huatiroma. Natian un Jesucristohuunoashu Upa Dios fu rafucacaini ua amapaiyai cuscan aashquin, —ishon anori shinancahuun.

¹²Ascacufin afanan chaca maton ifo imayamacahuun mato chaca huamapaiyai cuscan ayamacahuun ¹³Isca huaquin shinancahuun, —Yoshin chacan, mian chaca huamapaiyai cuscacai mian amatiroma. Uhuun cayacai minama mian chaca huamapanan, —ishon yoicahuun. Man chaca ipaoni cuscan man naa cusracoin. Ascafashu natian man funa cusracoin Upa Dios fu ipashquin. Ascano Upa Dios yoicahuun isca huaquin, —Upa Diosin, unfin minaquin.

Mian shara huamapaiyai cuscan ua huamahuu. Uhuun caya non uhuun nomuranri mina mian amapaiyai cuscan ua huamahuu, —ishon yoicahuun.

¹⁴Moisés yononi cuscacai non atiroma Upa Dios fu ipashquin. Nocon ifocai itiroma non nipanon. Ascatama Upa Diosin matohuun ramapaiquin arusu mato numatiro mato ifo iishquin. Ascano chaca afanan mato ifo itiroma.

Upa Diosin mato shara huamapaiyai cuscan man ahuun oinmati inon

¹⁵Moisés yononi cuscacai non atiroma noco imasharanon Upa Dios fu ipashquin. Ascan Diosin nocohuun ramapaiquin noco imashara. Nan fusti nocon ifo itiro noco numanon. ¿Ascanocai non chaca huafaintiromun Diosin nocohuun ramapainon noco

chaca soashonon? Ascayamapacupainon. ¹⁶Man tapian mafi man catontiro ratofomain mato ifoquin. Upa Dios man nicacointiro ahuun oinmati ishquin iyamarai chaca catontiro ahuun oinmati ishquin. Chaca catoanshu man omitsiscapashquin. Ascan man Upa Dios nicacoianshu man afu isharapacunaca. ¹⁷Man chaca catonpaoni ahuun oinmatifashon natian Upa Diosin mato yoimisi cuscan maton nomuran man nicacoin. ¡Aicho! Upa Diosin mato imasharamisi. ¹⁸Ascanocai chaca afanan maton ifo itiroma mato yonoshquin. Natian ahuara shara fusti maton ifo itiro. Manfin ahuun oinmatifoquin.

¹⁹Man oinmati yafi ifohuunoa man tapicoian. Ascan atohuunoa un mato yoipaiyai cuscan un mato yoi man shafacafi tapinon. Chaca futsa futsatapao man huapaoni. Ascacun chaca mato ifo ipaoni. —Ua chaca huamapaiyai cuscan un aashquin. Fasi finacaiari un chaca huairan, —ishon man shinanpaoni. Afananasca huayamacahuun. Natian Upa Diosin yoicahuun man ahuun oinmatifo. Afanan chaca huatama ahuara shara fusti ahuun oinmati man itiro.

²⁰Ipaoni chaca maton ifo icaino mancái ahuara shara shinanpaonima maton ifo inon. ²¹¿Man ipaoni cuscan sharamun? ¿Mato imasharamun? Ma. Ipaoni cuscacai afanan afohuunoa man shinanpaima. Afohuunoa man shinainno man rafitiro. Nan chacafo shatuyamaino man naitian man omitsiscapanacafo muran man catiro. ²²Ascafia natiancái chaca afanan maton ifoma Upa Diosin maton ifo. Manfin ahuun oinmatifoquin. Man ahuun oinmatifocun mato shara huafafaini a cuscara shara man inon man afu ipanon. ²³Tsoa chaca ahuun ifono ahunshon ato omitsiscapanacafo

murán potashquin. Ascafía nocon Ifo Jesucristohuunshon Upa Diosin noco cashman numano non afu ipanon.

**Nocofunu fu ainfo fiananfihuunoa
cuscara ahuara futsan ato tapimani**

7 ¹Uhuun yoramishtichin, un mato yoipaiyai cuscan man man tapicoian. Moisés noco yononi cuscan man man tapia. Non niyoano noco yonotiro. Non nano noco afanan yonotrioma. ²Iscara un mato tapimapai. Ainfo funun fianocai nocon caifoan yononi cuscan funu niyoano unutrioma. Ascacun funu nanocai afanan tsoan afanan yonotrioma. ³Funu nano futsan fitiro. Asca huaquicai chaca huatiroma. Ascafía funu niyoanocai futsa fu fianantiroma. Futsan fiaino furoma chaca itiro. Nannori nocon caifoan yononi.

⁴Uhuun yoramishtichin, nanscarifi aquin Moisés yononi cuscan maton funu cuscara nan maton ifo ipaoni. Ascafía Jesús mastanifotian marifi man afu naa cuscara coin. Naashu afanan Moisés yononi cuscan maton funu cuscara itiroma. Cristo naafishu funini cuscan marifi afu funini cuscara coin funa cuscara iishquin. Natianfin man Cristonaquin maton ifo inon a cuscara shara ishcaquin. ⁵Jesús man Ifo huataima chaca maton ifon ipaoni. Moisés mato yonopaiyai cuscan atama yoitimacoinshon man fasi chaca huapaoni. Nan chacafihuunoashu non natiro omitsispacunacafu muran noco imatiro. ⁶Non ascafiaponishaquin non Jesús fu naa cuscara coin.

Ascanocai Moisés cununi cuscan nocon ifo afanan itiroma. Nococai shinanmatiroma isca huaquin, —Min Moisés cununi cuscan ayamashu min nipatiromaran, —ishonai noco yonotrioma. Noncái afanan ahuun

oinmatima. Natian non Diospan Yoshin Sharahuunoashu non unimacoincain non Upa Dios yonoshotiro.

Chacapan ua ifoahuapai

⁷¿Ascano Upa Diosin Moiséshuunshon yononi cuscan chacamun? Ma. Anorima. Amaquiri shinanyamacahuun. Moisés cununi cuscan un oinyamashon un chaca huamisi un tapicuanama. Uhuun nomuran un chaca fuchipaipaoni cuscan uhuun ointi un noconi. Moisés cununi cuscan un oinyamashon uhuun ointi muran un shinancuanama. ⁸Ascafía Moisés cununi cuscan oinfiaquicai un chaca shatutama un finacaipaoni. Fasi finonmafain un chaca noipaoni. Upa Diosin noco yonoyamanicai non yoitima icuanama.

⁹Diosin noco yononi cuscan un tapipaonima un chaca huafiaquicai un mupaonima. Ascafía Diosin noco yononi cuscan un nicacoinshon un ahuunshon tapini unfin chaca huamisquin. Un tapiniri chaca huamisifo omitsiscapanacafu muran focani. ¹⁰Un shinanpaoni isca huaquin, —iOhuashta! Upa Diosin noco yononi cuscacai un aimá. Ua yononi cuscan un aiton ua nimapacueuana. Un ascayamacun ua omitsiscapanacafu muran ua camashquinran, —ishon un shinanpaoni. ¹¹Chacapan ua parapaoni. —Upa Diosin noco yononi cuscan un airan, —ishon un amaqiri shinanpaonima ascafiaqui un apaonima. Ascacun un tapipaoni uhuun chacahuunoashu un nai omitsiscuai.

¹²Man non tapia Upa Diosin noco yononi cuscan shafacafi sharacoin.

¹³Sharafiacucai un ascamisima. Ahuunshon ua tapimapaoi non chaca huamisi cuscan fasi chacacoincun. Upa Diosin yononi cuscan sharacoinfiacun ahuunshon mun tapini un ascayamashu un omitsiscacaini nai.

¹⁴Man non tapian Moisés cununi cuscan Diosin ahuun Yoshin Sharapan shinanmani. Nan sharafianocai un sharama. Chaca uhuun ifo. Unfin ahuun oinmatiquin. ¹⁵Ahuuscain un iscamisimum uncai tapiama. Un shara huapaiyai cuscacai un aama. Un asca huapaiyamafiaquin un amisi. ¹⁶Un asca huafiaquin uhuun nomuranshon un shinan, —Upa Diosin Moiséshunshon noco yononi cuscan sharacoinran, —ishon un shinain. Moisés yononi cuscan nannoricoín un shinain.

¹⁷Nannori shinanfiaquicai un chaca huai cuscan un shatutiroma. Uficoín un apaiyamafiaquin chaca uhuun ifono uhuun nomuran ua shinanchacamamisi.

¹⁸Mun tapia Upa Diosin ufu iyamaino un chacacoin. Diosimaisicai un ahuara shara shinantiroma. Un sharapaifiaicai un itiroma. ¹⁹Un sharapaiyai cuscan atama un chaca huamisiquin. Un chaca huapaiyamafiaquin un amisi. ²⁰Ascano un tapitiro uficoín un chaca huapaiyamafiaquin chaca uhuun ifon icaino ua yonomisi cuscan un shatutiroma.

²¹Ufi amisi. Un sharapaifiaiton chacapan ua amaquiri shinanmapai un shara shinanonma. Un ascamisi.

²²⁻²⁵Uhuun nomuran, —iAicho! Upa Diosin ua yonoa cuscan shararan, —ishon shinanfiai un nicayosmamisi. Ua yonoa cuscan mun tapifashu un nicayosmamisi. Chaca uhuun ifono ufi sharapaiyain cuscan un atiroma. Uncai chaca shatutiroma. Ascano un tapitiro uhuun nomuranshon un Upa Diosin oinmati ipai ua yononi cuscan aashquin. Ascafia un Dios ifo huayamaino un chacapan ahuun oinmati itiro ua yonomapaiyai cuscan aashquin. iOhushta! Uhuun nomuran un omitsiscai. Unfin chacaquin. ¿Tsoan ua numatiromun chaca afanan uhuun ifo

inonma? Nocon Ifo Jesucristohunshon Upa Diosin noco numani chaca afanan noco ifo inonma. iAicho! Upa Diosin, min noco shara huamisi.

Diospan Yoshin Sharahuunoashu non ica

8 ¹Ascano Jesucristo nocon Ifono nonfin ahuun yoraquin. Ascacucaí Upa Diosin —Min chacaquin un mia onaintimanon. Umaquinoashu omitsiscapanacafo muran catahuun, —noco huapanacama.

²Jesucristohunshon Diosin ahuun Yoshin Sharapan ahuun curushhuunshon noco nimashara afanan chaca nocon ifo inonma non omitsiscapanonma.

³Moisés yononi cuscan non tapifiacai aton noco isharamatiroma nocon chaca soashquin. Ascan Upa Diosin shinanni cuscan ahuun Furun nai muranshon mai ano nichini arifi noco cuscara yora inon. Noco cuscaraflashocai non chaca huamisi cuscan huamisima. Noco nashoni afanan chaca nocon ifo inonma.

⁴Ascano natian non Diospan Yoshin Shara tanashu Moisés yononi cuscan non atiro. Nocon nomuran chacapan noco shinanmapaiyai cuscan non afanan nicayamashon non Diosin tsain tanasharatiro.

⁵Non chaca shatuyamashu nan chacapan noco amapaiyai cuscan nan fusti non shinantiro. Ascan Diospan Yoshin Shara noco iquinano noco amapaiyai cuscan nan fusti non shinantiro. ⁶⁻⁸Diospan Yoshin Shara nocon nomuran iquinano nocon ointi fasi unimacointiro. Ascashu non Upa Dios fu ipasharatiro. Asca ratoranfo chacapan aton ifo icaino Diosihuunoa shinansharatiroma. Aton nomuran shinanchacamisifo Upa Dios noicasmaifoan. Ascan ato yonomapaiyai cuscan nicacasmamisifo. Chaca

shinancaquin Diosin tsain nicatirofoma. Nicayamashu Upa Dios fu ipatamarocon omitsiscapanacafo.

⁹Ascafia mancái atón cuscarama. Chaca afaná matón ifoma. Diosin ahuún Yoshin Sharafin mato fuqui. Nantofin mato yonomisiquin. Ointiaquimayamacahuun. Tsoan Jesús ahuún Yoshin Shara fu iyamaino ahuún yora itiroma. ¹⁰Jesús matofu rafuaino chacahuunoashu matón caya naashquin. Matón caya nafiacún matón yoshin Criston fiananá huai shara man inon afu ipashquin. ¹¹Jesús naafiacún Upa Diosin Yoshin Shara funimani. Nan Yoshin Shara matofu rafuaino matori funimashquin matón caya afaná nisharanon.

¹²Ascacún uhuún yoramishtichin, Diospan Yoshin Shara no fu rafuaino Upa Diosinhuunoa non shinantiro nocó amapaiyai cuscan aquin. Non chaca huamisi cuscacai non afaná shinanpaitiroma nocó amapai cuscan aquin. ¹³Chaca nocohuun nuano non omitsiscapanaca nai. Ascafia Diospan Yoshin Sharahuunshon non chaca huamisi cuscan non shatuaíno afaná chaca nocohuun nutiroma non Upa Dios fu nisharapacunon.

¹⁴Diospan Yoshin Shara ato amapaiyai cuscan nicasharamisi. Nanfofin Diospan yorafoquin. ¹⁵Ahuún Yoshin Shara nocó shinansharamapai non afaná ratunonma. Nonfin Diospan Yoshin Shara fiacún nanton ahuún facufo nocó ima. Ahuunshon non yoitiro isca huaquin, —Upa Diosin min uhuún Upashtaran, —ishon non yoitiro. ¹⁶Nocon nomuranshon Diospan Yoshin Sharapan nocó yoi isca huaquin, —Min Upa Diosin facucoinran, —ishon nocó yoi. ¹⁷Non ahuún facufocun Apan ahuún facucoin inantiro cuscan nocori inanshquin. Criston ahuún Furuncuinin

noco fasi omitsiscashoni. Omitsiscafianishaquin natian Apa Dios fu isharapacunaca. Nantifi Apanari ahuuna. Ascano norifi ahuunoashu natian non omitsiscafiai norifi chipo non afu Upa Dios ano isharapacunaca. Apan Cristo inan cuscari norifi non ahuún facufocun nocori inanshquin.

**Chipo norifi Upa Dios yafi Cristo fu
nisharapacunaca**

¹⁸Shinancapon uhuún yoramishtichin. Natian non ahuunoashu omitsiscafiaquin non shinanchacanonma. Non aqui nocoino a cuscara shara nocó imai. Non omitsiscai cuscan cuyoshquin. Ascan nocó imashara cuscacai unupacunacama. ¹⁹Upa Diosin ahuún facufo funimashquin a cuscara sharacoin imashquin. Ascan nan onihuanifoan manacani fasi oinsharapaicaquin ahuu cuscaramain non chipo ishquicain. ²⁰⁻²¹Onihuanifocai payocopaiyamafiai Diosin yononi cuscan payococani. Ascafiaquicai Upa Diosin nocó funimanaitiancai onihuaniti afaná payoconacafoma. Nantianri non afu isharamisi afaná ahua chaca finontama. Nanscarifiai onihuanifoti sharashtacoin icani afaná chacanatiroma.

²²Man non tapia ainfoan facu Cainquin isin mui pashapaitiro. Nanscarifiai nan Diosin onihuanifo omitsiscacaini nashcani. Natianri nanscasi acani. ²³Norifi non Diospan facufo ahuún Yoshin Shara no fu rafuaino non tapitiro non chipo Dios fu isharatirofashu natian non isinin itiro pashapaicain. Ascaquin non manasharatiro Upa Diosin icano nocó ihuinon non ahuún facufocun a cuscara shara nocó imanon. Natianri nocon caya funa sharacoin afaná isinin iyamacain

nonricai afanan natiroma.²⁴Noco a cuscara shara imai cuscacai icataima. Ascafia non icoindra huaiton noco numatiro a cuscara shara non inon. Icoindra huashon unimayanan non manasharatiro funaquinma non aqui nocooitiam. Aqui nocoshocai non afanan manatiroma. Manmain oinquiñfin.

²⁵Ascafia noco ihuiatama funaquinma non manasharayotiro.

²⁶Nanscarifi aquin Upa Diosin ahuun Yoshin Sharapan noco ashosharafanfainni. Ahuuscashomain non Upa Dios cufisharatiroquin noncái tapiama. Ascan ahuun Yoshin Shara nocohuunshon noco cufishotiro. Nocohuun ramapaiquin noco cufishonai cuscan sharacoin tsoancai aaton cufiai cuscan huatiroma.²⁷Ahuun Yoshin Sharapan shinain cuscan Upa Diosin onancoian. Nantifi nocon nomuranri non shinain cuscan tapicoian. Upa Diosin noco amapaiyai cuscan nannori ahuun Yoshin Sharapan icoindra huafoti cufishomisi.

Jesushuunshon non nantifi finoncointiro

²⁸Ascano non tapia Upa Diosin noco catonni noco amapaiyai cuscan non anon. Non Upa noiaino ahuarao ahuuscara afiaino afihuunshon Upa noco shara huashoin. Norifi non icoindra huai.²⁹Non Jesús Ifo huataima Upa Diosin tapyoni ratofoanmain icoindra huaicain. Icoindra huaafotaima shinanni isca huaquin,—Nanfo uhuun facu cuscara un ato imashquinran,—ishon shinanyoni. Ascashon Furun Jesús funimaqui tau huani. Ascashon nocorifi funimashquin a cuscara non inon ahuun chipo facufo inon icai.³⁰Onanyoni non ahuun facufo ishquinon. Ascano noco nomuranshon noco yoini,—Uhuun facu icoindra huahuu. Tsoan anori yoiaiton un ato chaca soashoni isharanonfo,—ishon

Upa Diosin yoini. Aton chaca soashonano ahuun Furun sharashtacoin cuscara inonfo.

³¹¿Noco asca huasharaino non raquiri yoitiromun? ¿Upa Diosin noco shara huafafainaino futsafoan noco raquiri huatiromun?³²Upa Diosin nocohuun noiquin Furun numanima noco nantifihuunoashu nashonon. Ascanishaquin ahuara futsa non yopai cuscan nanfori noco inanshquin.³³Upa Diosin noco catonni nocon chaca soashonano Furun cuscara shara non inon. ¿Ascano tsoammun,—Min chacaran,—noco huatiroquin?

³⁴Jesucristo noco nashocun Apan funimani. Apa Dios icano ato nantifi iquinon. Natianri Upa Dios noco cufishofafaini. Nan iconcuacain tsoan,—Min chaca huamisiquin. Asca omitsiscapanacafo muran mia potanon,—noco huatiroma.³⁵Tsoancai noco Cristomaqui imatiroma noco noinonma. Non omitsiscacain nocon nomuran fucash huafain non Jesushuunoa yoiaiton noco omitsiscamafain non fonicain nocon sahuuti yopacain noco musumafain noco rutupaifain noco huafiaquicai noco Cristomaqui imatirofoma noco noinonma.³⁶Diosin tsain cununi isca huaquin,

“Upa Diosin, shafatifi non itisharai mihiunoashu naashquin.

Chashoanfo yosicun Ifoan ato rutumamisi. Nanscarifi aquin nocori rutupaicaniran,”

ishon cununi.³⁷Noco asca huafafainfiaifoan Jesús noco noiaino ahuunshon non ato finoncointiro.

³⁸⁻³⁹Jesucriston nocon Ifonocai ahuashtaton Upa Diosmaqui noco pashcamatiroma noco noinonma. Nan un icoindra huacoinni. Upa Diosin nocohuun noiainocai ahua ahuuscatiroma nocohuun afanan

noinonma. Non nafiancuai amaqui
noco pashcamatiroma. Non niyo
anoricaid amaqui nocoo pashcamatiroma.
Ahuun oinmatifoanricai amaqui nocoo
pashcamatiroma. Yoshin chacafoanricai
nocoo amaqui pashcamatirofoma.
Ahuarao natian icai cuscaricai nocoo
amaquinoa pashcamatiroma. Inonpacooi
cuscaricai nocoo amaqui
pashcamatiroma. Ahuara chacafo aton
niaifoanri amaqinoaa nocoo
pashcamatiroma. Nan nai ariafo yafi
mai anoafaoanricai nocoo amaqui
pashcamatiroma. Upa Diosin nocon Ifon
Jesucristohunshon nocohuun noi.
Ascano nantifi onihuaoanricai amaqui
nocoo pashcamatirofoma afanan nocoo
noinon.

**Upa Diosin Israelifo catonni
ahuun yorafo inonfo**

9 ¹⁻³Uhuun yoramishtichin un
Cristohunshon iconquin un mato
yoi. Un muai cuscan mun tapia unca
mato paraima. Un mato iconquin yoi.
Diospan Yoshin Sharán ua shinamanai
cuscan un iconquin yoicain. Uhuun
caifo Israelifoancai nocon Numamisi
icoinra huafoma. Ascacun uhuun
nomuran un atohunoashu
omitsiscacaini. Un ato fasi
shinancoinmisi. Uhuun caifo uhuun
nomuran un ato shinamisi isca
huaquin, —Upa Diosin uhuun yora
Israelifo un ato numapai mifu
nipanonfo. Ascano ato Cristomaqui
omitsiscapanacafo muran
potatamarocon uacai potahuu un ato
numanon, —ishon un anori
shinanfainocai Upa Diosin ascatrioma.
⁴Upa Diosin ato catonni ahuun yorafo
inonfo. Ato fu iyoshon ato ismapaoni
ahuu cuscaramain aaquin. Ato shara
huapaiyai cuscan ato yoiyoni. Ascashon
ato yononi isharanonfo. Ato yosini

ahuuscashomain ichananshon
cufitirofoquin. Ascarifi atan ahuara
sharacoin ato ashoin cuscan yoiyoni.
⁵Maton shunifofoan Upa Dios
tanasharafafainpaonifo. Nocon Ifo Cristo
arifi Israeliri ini. Nocon shuni Abraham
non Isaac non Jacobori aton funa. Aafin
natian nantifiton aton ifoquin ato
iquina. Ascan Upa Dios fasí shararan
non huapanon. Amen.

⁶Upa Diosin nocoo yoisharayoni cuscan
uhuun caifo Israelifoan iconra
huayamafiaifoan ahuun tsain iconcoin.
Ahuun yorafo yoiyoni cuscan
ashquiquin. Ahuun yorafo shara
huafainocai atirifi Israelifo Diospan
yorama. ⁷Nanscarifi aquicain Abraham
acai cuscan ahuun funa atirifoan iconra
huamisima. Afocai Diospan yorama.
—Abraham ahuun facu futsafoyafiacun
Diospan tsain cununi cuscan ahuun facu
Isaac yafi ahuun funafo nanfosi Upa
Diosin yoiyoni cuscan fitiroran, —ishon
cununi.

⁸Ascano non tapitiro atirifi Abraham
funafocai Diospan yorama. Diosin
Abraham yoiyoni ahuun facu chipo
cainshquiain. Yoiyoni cuscan Abraham
icoinra huan. Nan icoinra huafosi
Diospan yoraquin. Abraham facu
cuscarao. ⁹Abraham ahuin Sarapan
facu nanuataima Upa Diosin yoiyoni
isca huaquin, —Fari futsan un miqui
nasoshquin. Nantianri min ahuin
Sarapan facu furonanfacu cainshquiran,
—ishon yoini.

¹⁰⁻¹³Ascano man fari ichapa finontan
Sarapan facu Isaac ahuin Rebeca
rafanacani. Caiantaima Upa Diosin yoini
isca huaquin, —Min facu Esaú Cain taui.
Afu rafanaca Jacob. Chipocuton oinmati
cuscara iyoa ishquiran, —ishon yoini.
Caiantaimacai ahua chaca huafain shara
huatian inima. Ascafian Diosin yoiquin,
—Jacob un noiquin un ashoin. Un iyoa

Esauciai un noiquin asca huaima, —ishon Diospan tsain cununi. Ascano non tapitiro Diosin inonpacoai shinanyoni cuscan atiroquin. Esaú futan Jacob amisifo cuscacai shinanyonima. Aafin apaiyai cuscan yoiyoni.

¹⁴¿Ascano Upa Diosin shinancoinmamun? Ma. Anoricai non shinantiroma. ¹⁵Upa Diosin yoini isca huaquin,

“Nan un noipaiayaifin un noitiroquin. Nanscarifiai nan unahuun ramapaiyaihuurifi un ramapaitiroquin,”
ishon Upa Diosin Moisés yoini.

¹⁶Ascano non tapitiro futsan shinanquin, —Diosin ua shara huashopainon, —ishon shinantiro iyamarai, —Un Upa Dios yonoshosharatiro ahuun rafanan ua inansharatiroran, —ishon non shinanfiatirocái anorima. Upa Diosin afin nocohuun ramapaiquin noco catontiro non ahuun yorafo non inon noco inansharashquin. ¹⁷Ascano Upa Diosin Egipciofo aton niaifo yoini, —Un mia niaifo imashquin nantifi manifoti anoafaoan un ahuamamishti huatiro minhuunshon tapinonfo, —ishon yoini. ¹⁸Ascacun non tapitiro Upa Diosin futsa ahuun ramapaiyaihuunri ramapaitiroquin. Nanscarifi aquin futsan chaca huafafaina cuscan shatuamashu ointi mutocoin imatiro.

¹⁹Man futsan ua yoiraca isca huaquin, —Ascacun non chaca huaiton noco shatumanama nocon ointi mutocoin imashquin. ¿Ascafia ahuuiscain Upa Diosin nocohuun nuamun? Afin apaiyai cuscacai tsoan atima huatiroma, —itsairaca amaquiri yoiquin. ²⁰Ma. Asca huayamacahuun. ¿Ahuuscaín min Upa Dios tafipaimun? Minfin nocofunuquin. Aafin Diosiquin. Ahuara onihuamuatocai yoiqui isca huatiroma,

—¿Ahuuscaín mian iscara onihuamun? —huatiroma. ²¹Cutin onihuamisiton mapo nan apaiyai cuscara shara cutin huatiro. Futsa amuran ahuara chaca nanuti huafain futsa amuran ahuara shara nanuti huatiro.

²²Nanscarifiai Upa Diosin nantifi yora onihuafiacun atirifoan ahuun tsain nicacasmamisifo. Funainquimashta ato yoiyofiaiton nicayamacaiyaifoan inoncái atoqui sinaquin. Ato potatiro chacani fustisi tapiaifoan. Asca huaquin ato ismatiro ahuamamishti huatiro cuscan. ²³⁻²⁴Ascafiai non ato cuscarama. Nocohuun ramapaiquin noco tapimamisi. Ascatari noco itisharamai unimacoinceai non afu ipanon. Noco Israeli fusti catonnia non afu ipanon. Mani futsafori catonni. ²⁵Oseas nan inonpacoai yoimisiton Diosin tsain cununi isca huaquin,

“Futsafo Israelifomari un catonshquin uhuun yorafori inon. Tsoancai ato noiyomisimafiacun un ato yoishquin. Un mato noiran,”
ishon Upa Diosin yoini cuscan Oseas cununi. ²⁶Afanan ato yoini iscahuauquin,

“‘Mancaí uhuun yoramaran,’ ishon Diosin mato yoiaran, huanifo. Ascafia chipo atohuunoa yoishcaquin, ‘Upa Diosin niaton man ahuun facuforan,’ ishon yoishquicani.”

²⁷Isaías nocon caifo Israelifohuunoa yoini, “Israelife ichaparasi ishqicani tsoan ato tanan huatiromafiashu fustirasiton icoine ra huashquicani Upa Dios fu ipashcaquin. ²⁸Yoini cuscan iconcoin. Yoiyoni cuscan manifoti anoafaoan nan icoine ra huafoma nocon Ifoan ato onaintimariscashquin. Afanan ato manashquima,”
ishon Isaías cununi. ²⁹Ascashon Isaías afanan yoiyoni cuscan nanscacoiai. Isca huaquin,

“Upa Diosinahuamamishti huatiro. Nocon caifo Israelifo fustirasi numani atifi cuyononfoma. Asca huayamaino non Sodoma yafi Gomorra cuscarao icuana. Nonrifi non cuyocuanaran,”
ishon Isaías cununi.

Israelifo yafi nan tsain shara Jesushuunoa

³⁰¿Ascano afohuunoa non raquiri yoitiromun? Nan Israelifoanmacai aton chaca shatucasmamisima Upa Diosin icoira huashquin aton chaca soashonon. Ascafia natian atirifoan Jesús icoira huaifoan Upa Diosin aton chaca soashona a cuscara shara inonfo. ³¹Ascafia uhuun caifon Israelifoan Upa Diosin Moiséshuunshon ato yononi cuscan sharapaicaquin. Ascaficai Moisé yononi cuscahuunoashu shara inonfoma. ³²¿Ahuuscain iscaimun? Un mato yoinon. Nanfoancai Diospan Furun Jesús icoira huaafoma aton chaca soanon. Ascatamarocon Moisé ato yononi cuscahuunoashu isharapaiyao aton chaca soashquin. Un mato ahuara futsa nicamapai. Toquiri fasi uhuapa fai naqui raca finonpai aqui oroshcomutiro.

³³Nanscarifi aquin Jesús finonpaiyaoancai icoira huacanima nipashcaquin. Nannori inonpacoai cuscan Isaías Diospan tsain cunuyoni isca huaquin,

“Un Israelifo aton fai naqui toquirininhuan ratain. Ahuunoashu yorafo pacunonfo,”
ishon cununi.

“Nanscarifi aquin Upa Diosin Jesús Israelifoqui nichini tsoan icoira huayamashu funocoincani nipashcaquima,”
ishon cununi isca huaquin,

“Ascafia tsoan icoira huacoinkhon shinanchacanacamaran,”
ishon Diospan tsain Isaías cununi.

10 ¹Uhuun yoramishtichin, uhuun nomuran uhuun caifo un fasi shinain. Un atohuunshon Dios cufifafaini Jesús icoira huanonfo Dios fu nipashcaquin. ²Mun tapia nanfoanfin Upa Dios fusti fasi tanapaisharafiaquin amaqiri shinanfoquin. ³—Nonfin Moisé noco yononi cuscan non aino Upa Diosin nocoqui unimatiro noco numanonran, —ishon shinanpaonifo. Ascano Upa Diosin ato Jesushuunshon imasharapaiyai cuscan afu ipashcani. Ascafia nicacasmapaonifo. ⁴Moisé yononi cuscan Criston mai ano niyoshon nantifi apaoni. Ascano Moisé noco yononi cuscacai non afanan yopatiroma nocon chaca soanon Upa Dios fu ipashquin. Tsoan Cristo icoira huaiton aton chaca soashotiro afu ipasharanon.

⁵Moisé isca huaquin cununi, —Upa Diosin noco yononi cuscan nantishon tapiquin non chaca huayamashu Upa Dios fu non nipatiroquin, —ishon cununi.

⁶Ascafia non Jesús icoira huashon non isca huaquin yoitiro, —Maton nomuranshocai man isca huaima, “¿Tsoamun nai muran catiroquin Cristo fotomashquin noco numayonon?”

⁷Iamarai, “¿Tsoamun mai muran catiroquin Cristo furnishquin?” —ishon yoiyamacahuun. ⁸Anorimaquin. Man Cristo icoira huaiton mato numatiro. Nannori non mato yoimisi. —Mancaí raqui cayotiroma Cristo fu ishquin. Natian man Cristo yoitiro matofu rafunon. Maton nomuranri man icoira huacun matofu rafutiroran, —ishon Moisé cununi. ⁹Ascano, —Jesús uhuun Iforan, —huafain man shinanquin isca huai, —Jesús nafiacun Apa Diosin funimaniran, —ishon maton nomuran man icoira huaiton maton chaca soashotiro afu man ipanon.

¹⁰Ascan maton nomuranshon man icoira huacun Upa Diosin maton chaca

soashotiro man isharanon. Man futsafo, —Jesucristo uhuun Iforan —ishon yoiaiton mato imapacunaca. ¹¹Nannorifi Diospan tsain cununi, —Tsoan Criston Diospan Furun icoinra huaashucu rafipacunacafoma, —ishon cununi. ¹²Israelifo iyamarai mani futsafoan icoinra huaifoan aton Ifo itiro. Diosinacai ahua rafuma. Nanscarafosi. Nan icoinra huafoti aton Ifon. Fasi atohuun noiquin ato ya imapacunon. ¹³Ratoran nocon Ifon icoinra huashon yoiqui isca huaiton, —Ifon, ua numahuu, —huaiton afu ipatiroquin.

¹⁴¿Ascafia ahuuscashocon, —Jesús ua numahuu, —huatirofomun icoinra huacatama? Ahuunoa nicamisimashaquicai ahuuscashon icoinra huatiroma. ¿Futsan Jesushuunoa ato yoiyamaino ahuuscashocon nicatirofomun? ¹⁵Ahuuscashocon yoiftirofomun futsan ato nichiamaino? Nannori Diosin tsain cununi isca huaquin, —Nan tsain shara futsafo yoifononfo nan fasi sharacairan, —ishon Isaías cununi. ¹⁶Ascafia nan tsain shara atirifi Israelifoan icoinra huacanima. Nannori Isaiasin afanan cununi isca huaquin, —Ifon, non ato yoia cuscan tsoan icoinra huamun? —ishon yoini. ¹⁷Ascano tsain shara nicaquin icoinra huatirofo. Nan tsain shara Jesucristohuunoa.

¹⁸¿Uhuun caifo Israelifoan nan tsain shara Jesushuunoa nicamisimun? Ai, man nicamisifo.

“Manifoti anoafaoan nan tsain shara man nicafo,”
ishon David cununi. ¹⁹¿Uhuun caifoan tapinimamun nan tsain shara Cristohuunoa nicacasmaifoan Upa Diosin caifo futsafo yoitiro ato numaquein? Ai, man nicamisifo. Moisés niyoshon ato Diosin tsain yoini isca huaquin,

“Uhuun yora Israelifoan un afanan ato uhuunoa shinanmapai. Ascan un caifo futsafo uhuunoa un shinanmai Cristohuunoa shinanonfo ato numanon. Nan oincani Israelifori uqui nasopaitirorán,”
ishon Diosin yoini cuscan Moisés cununi. ²⁰Chipo Isaías ranotama yoini isca huaquin,

“Mani futsafoan ua funayamafiacauin ua icoinra huao. Uhuunoa yocayamafiamisishaquin un ato uhuunoa onanmanaran,”
ishon Diosin yoini cuscan Isaías cununi.
²¹Ascafia uhuun caifohuunoa yoini, “Un shafatishon un ato cuna uqui fucahuun. Un ato huafiacai uqui fupaicanima. Yoitimamisiforán,”
ishon Upa Diosin yoini cuscan Isaías cununi.

Ascan Upa Diosin Israelifo catonni

11 ¹Ascano un mato yocanon. ²Upa Diosin ahuun yora Israelifo potapacunacumun? Ma. Anorima. Unrifi Israeliquin. Abraham non Benjamín uhuun shunifo. ³Upa Diosin ahuun yora inonpacocai cuscan onanshocai ato potamisima. Shinancapon. Nocon shuni Elías Israelifohuunoa Upa Diosin yoini isca huaquin, ⁴Ifon, min tsain inonpacocai cuscan yoimisifo rutuafó. Mia a muranshon cufiti choquiaquin futsafo. Uru fusti un tushufiacun uari rutupaicaniran, —ishon Elías Upa Diosin yoini.

⁴¿Ascan Upa Diosin raquiri Elías cumanimun? Isca huaquin cumani, —Ma. Mirus fusticai min tushuama. Siete mil min yora futsafoanri ua noiafo ahua futsacai ifoanfoma. “Baalcai uhuun diosiran,” huamisifomaran, —ishon Diosin Elías cumani. ⁵Nanscarifi aquin natianri Upa Diosin uhuun caifo

fustirasi catoan atohuun ramapaiquin.
 6Ahuara shara huaa rafanancaí ato catoanma. Atohuun noiquin ato catoan. Dios non yonoshonaitocai noco catoanma. Ahuara yonoshomacai non cashman fitiroma. Ascanfiacai non Upa Dios yonoshotiroma noco catonon. Noco cashmancion catoan.

7Ascano uhuun caifo Israelifo Moisés yononi cuscan apainifo aton chaca soanon Diospan yora ipaifiashucái ahuun yorafo icafoma. Diosin catoanfosi aton chaca soashona ahuun yorafo inonfo. Nan futsafoan aton ointi mutonifo. 8Nannori Diosin tsain cununi isca huaquin,

“Upa Dios nicacasmafo. Ascan ato oshamana cuscara shinantsa afo ahuunoa shinanonfoma. Oinfacani fusho cuscarafo.

Nicapaicoinnifoma. Ascaiton ahuun tsain shara ato tapimanima.

Natianri nanscacani,”

ishon Moisés cununi. 9Nannori nocon niaifo shuni ipaoniton David yoini isca huaquin,

“Nan nicacasmamisifo onaintimapainon. Tushu ichapayafo futan mafo ichapayafoanriraca shinanco Upa Diosin atoqui unimai. Ascarama. Amaquiri shinanshu omitsiscapainonfo. 10Ato fusho cuscara imapainon. Ato cacoapainon aton ointi ihuu ipainonran,”

ishon David Dios
nicacasmamisifohuunoa yoini.

Israelifoanmari Jesús icoinra huacanashu afu nipanono

11¿Ascano uhuun caifo Israelifoan nicacasmamisifoquin Upa Diosin ato potapacunacamun? ¡Ma! ¡Anorima! Chaca huaoan Jesús nicacasmacani. Ascacun mani futsafo Jesushuunoa yoi

icoinra huanonfo afu ipashquin. Nanfoan Jesús icoinra huaiton uhuun caifo Israelifoan oincashon shutitan ifoanpaitirofo. Nannori Upa Diosin ato shinanmapai. 12Uhuun caifoan chaca huapaonifo Jesús ifoanpaiquinma. Ascano Upa Diosin manifoti anoafó Jesushuunoa tapimanano icoinra huashu nipanono. Ascano isharafo. Diosin ato shara huashoan. Ascafia uhuun caifori chipo Jesús icoinra huacanashu nantifi manifoti anoafó mimacai unimashcani.

13Man uhuun caifoyamafiacun Upa Diosin ua mato muran nichini Jesushuunoa un mato yoinon. Un Jesús fu rafumisi. Ascashon un ahuunoa mato yoi. Un fasi unimai Upa Diosin ua catonni un mato yoinon. 14Uhuun caifori un yoimisi Upa Diosin ua matoqui nichini. Man unimaiton oincani afoanri mato shutipaitirofo Jesús icoinra huapaicaquin. 15Shinancapon. Afoan Jesús ifoanpaiyamaifoan. Mani futsa anoafó Upa Diosin ato tapimaní. Nicacashon Jesús ifoannifo. Nan sharafiahu uhuun caifoanri Jesús icoinra huaifoanno fasi sharacoin iishquin. Yora naashu funia cuscara itiro. 16Uhuun caifoan Jesús icoinra huaquin tau huanifo. Ascan nocon funafori chipo Diospan yorafo iishcani. Fanafo ahuun tapo sharano ahuun poyanfori shara itiro. Nanscarifi aquin Upa Diosin Israelifo catonni ato shara huaquin. Ascano aton funafori catonshquin aforifi imasharashquin ahuun yorafo inonfo.

17Un mato iscara tapimapai man tapinon. Israelifo ihui fana poyan cuscarafo. Abraham Dios icoinra huaquin tau huano. Ahuun funafori Diospan yorafo ipaonifo. Nanfofin ihui fana poyan cuscarafoquin. Natian Upa Diosin ihui fana poyan fimioma

poshtushon potani. Nanscarifi aquin Israelifoan Jesús icoinra huayamaiton ato pota. Manfin nan ihui poyan futsa cuscarafoqui. —Ihui olivoran, —ishon anuni. Nan ihui fana olivo ahuun poyan futsaqui tuchia. Abraham fana futsa poshtushon futsaqui tuchia cuscara. Nanscarifiai uhuun caifoan man icoinra huayamaiton Diosin mato ihui ahuun facufo man inon. Diosin Abraham yoini cuscan natian marifi man ahuun yorafo inon.

¹⁸Ihui fanacai ahuun tapomaisi nitiroma. Tsasitiro. Ihui fana ahuun poyanfo non ahuun tapohuunoashu nipatiro. Poyafoancai ahuun tapo nimiatiroma. Nanscarifiai mancái Jesús nimapacutiroma. Nantocaifin mato nimapacutiroquin. —Noncái futsafo cuscarama. Nonfin Diospan yorafoquin, —iyamacahuun. Cacapaimisi iyamacahuun. ¹⁹Man shinanraca. Fana poyan chacaran ishon man poshtushon potatiro. Nanscarifi aquin Israelifoan icoinra huayamaifoan ato potani. Ascano non ahuun yorafo inon. Ascacun, —Non shararan —ishon man shinanquin. ²⁰Nan iconfiashu oinfain. Nan Israelifoan icoinra huayamaifoan Upa Diosin ato potani. Man icoinra huashufin ahuun yorafo man iquicai. Ascano cacapaimisi itama, —Non Jesús icoinra huayamashu non funotiroran, —ishon shinancahuun. ²¹Israelifoan icoinra huaquin tau huafianishacaquin chipo aton funafoan icoinra huayamaifoan Diosin ato potani. Manrifi man icoinra huayamaiton matori potatiro.

²²Ascacun shinancapon. Upa Diosin matohuun ramapaiquin ahuun yorafo mato imai. Israelifoan icoinra huayamaifoan ato onaintimaquin ato potani. Ascano matohuun ramapaiyai cuscan shinanfaicaahuun. Icoinra

huafafaincahuun. Man ascayamaiton matori potatiroquin. ²³Uhuun caifofoan afanan chaca shinainyamaifoan Jesús icoinra huaifoan afanan ahuun yorafo Upa Diosin ato imatiro. Fana poshtushon afanan poyan tuchitiro cuscan atorifi huatiro ahuun yorafo inonfo. ²⁴Ifoancai ihui olivo fanamisima ahuun poyan shatushon fana futsaqui tuchini foaisharanon. Nanscarifi aquin man Diospan yora ipaonima. Ascano natian Upa Diosin mato ihuia man ahuun facufo inon. Ascacun mimacaiquin uhuun caifo afanan ihuitiro ahuun yorafo inonfo. Jesús icoinra huaifoan ahuun yorafo ato imatiro.

Upan Diosin Israelifo numashqui ahuun yorafo inonfo

²⁵⁻²⁶Uhuun yoramishtichin, tsain futsanhууноа man shinamisima un mato tapimai maton nomuran man shinanon. Nan tapianshu cacapaimisi man inonma. Icon natian uhuun caifo Israelifoan aton ointi curushu Diospan tsain shara Jesushuunoa nicacasmacani. Ascafia uhuun caifomafoan ahuun unutaqui Jesús icoinra huaifoan Upa Diosin ahuun yora imashquin. Nantianricai afanan uhuun caifoan nicacasmamisi ishcanima. Ascano nantifi Israelifoan Jesús icoinra huaifoan Upa Diosin ato numai ahuun yorafo inonfo. Nannori nocon shuni Isaías cununi isca huaquin,

“Nocon Numamisi Síón ano icaquin. Afin Israelifo numai oi afanan chaca huanonfoma.

²⁷Nantianri un yoini cuscan un aton chaca soashoshquiran,”
ishon Diosin yoini cuscan Isaías cununi.

²⁸Uhuun caifofoan tsain shara Jesushuunoa nicacasmacani. A noicasmacaquin. Ascacun Upa Diosin

mato shara huashoan. Ahuun tsain shara Jesushuunoa man icoimra huanon. Mato shara huafiano uhuun caifoan nocon shunifo Abraham non Isaac non Jacob yoini cuscan ointiaquimama. Ascacun atohuunshon atom funa Israelifori ato noi.²⁹Upa Diosin nocon caifo inanopacoai cuscan yoiyonishaquin afanan shinan futsanpacunacama.

³⁰Mancaí Upa Dios nicapaipaonima. Ascafiacon Upa Diosin uhuun caifo shara huapaiyai cuscan ato shara huatamarocon matohuun ramapaiquin mato shara huai.³¹Nan man nicacasmapaoni cuscarifi uhuun caifofo nanscarafosi. Ascafiano matohuun ramapaiyai cuscan aforifi chipo Upa Diosiqui nasoshcani atohuun ramapainon.³²Upa Diosin yoini cuscan nantifi maniafotiton chaca huamisifo. Ascafiacon atohuun ramapaiquin ato numanon.

³³iAicho! Nocon Dios fasi sharacoin. Nantifi yorafohuun ramapai unupacunacama.

Aafin apaiyai cuscan tapicoianquin. Nantifi tapicoian inonpacoai

cuscan tapifain aafin noco ashooi cuscan tapicoian.

Ahuun nomuran yorafohuunoa shinain cuscan non tapipaifiaquicai tsoanshta tapitiroma.

Aaton acai cuscan tsoan tapitiroma.

³⁴¿Tsoamun nocon Ifoan shinain cuscan tapitiroquin?

Tsoancai Dios tapimatiroma ahuun tapimamisi inon.

³⁵Tsoancai Dios ahuara inantiroma ato nifinon.

³⁶Arusu ahuun nomuran shinain cuscan nantifi onihuani.

Ahuun curushhuunoashufin nantifi itiro.

Nantifi ahuuna.

Nantifi onihuafotiton ahuunoa yoisharapacunacafó.

Ascacun, —Diosin sharacoinran, —huapanonfo.

Amen.

Ahuuscashumain Diospan ahuun yonomati non itiroquin

12 ¹Uhuun yoramishtichin un mato yoisharapaiyai cuscan acapun.

Upa Diosin matohuun ramapaiquin mato shara huamisi. Ascacun marifi matohuunoa inancahuun mato ifo inon ahuun yonomati ipashcaquin. Man ascaino afanan chaca maton ifo itiroma ahuunacoin man inon. Shinancapon. Man cayacafi shinansharacoinquifin matohuun noiai cuscarifi marifi man ahuun noitiroquin. Man ascaino Upa Diosin fasi matoqui unimacoin.

²Ahuarafoan Upa Diosimaqui mato imapaiyaiifo cuscan atama shinan futsancahuun Diosin mato imapaiyai cuscan aashquin. Man shinanpaoni cuscan afanan shinanyamacahuun.

Natian Diosin maton nomuran shinan futsama sharapaiyai cuscan shinancahuun. Man ascaquin man tapitiro Upa Diosin mato imapaiyai cuscan sharacoin. Mato imapaiyai cuscan man aino matoqui unimacointiro. Ahua futsacai man yopatiroma.

³Upa Diosin uhuun ramapaiquin ua maton muran nichini un mato tapimanon. Ascan un nantifi mato yoisharapai. Cacapaimisi iyamacahuun. Diosin mato imapaiyai cuscan fusti shinancahuun. Ahua futsa ipaiyamacahuun. Man Dios icoimra huatiro cuscan afin mato shinanmanaino cayacafi shinansharacahuun. Man icoimra huua cuscan nan fusti Upa Dios ashocahuun.

⁴Un mato ahuara futsa yoipai isca huaquin. Nocon cayan fustifiano non pashcoi futsua. Afocai ascarafosima.
⁵Nanscarifiai nocon Ifon Jesús fusticoin. Nonfin ahuun yorafoquin. Non ahuun cayan cuscaraofoashu non yopanonicalinquin.

⁶Upa Diosin nocohuun noiqui cashman noco imapaiyai cuscan non ahunshon futsafo ashosharatiro. Noco imapaiyai cuscacai non ascarafosima. Upa Diosin man atirifi catoan ahuun shinanhunshon icoira huua futsafori ahuun tsain yoinon. Mato catoncun man icoira huashon mato yoia cuscan futsafori ahuun tsain yoicahuun.
⁷Ratoranfo catoncun ahuun shinanhunshon futsafori ashosharanon ato shara huashofafaincahuun. Ratoranfo catoncun ahuun shinanhunshon ahuun tsain ato tapimasharacahuun. ⁸Ratoranfo catoncun ahunshon futsafo ointi fupi huamafafaincahuun. Ratoranfo catoncun yopaifo inanquin ato unimacain inansharacahuun. Ratoranfo ahuun shinanhunshon futsafo yononon Diosin shinanma cuscan ato yonosharacahuun. Nan mato catoncun ahuun shinanhunshon omitsiscafohuun ramapaiquin unimaquin ato ashosharacahuun.

Futsafohuun noicoincahuun

⁹—Un mato noiran, —ifiacatan parayamacahuun. Atoqui shinanchacayamacahuun. Yorafohuun noicoincahuun. Ahuara chacafo noicasmacahuun. Ahuara shara fasi noicahuun. Afo potayamacahuun. ¹⁰Nan man icoira huafoti noinancahuun. Maton yoracoinfo man noimisi cuscan huafainri futsafo ya noinancahuun. Yoinansharatanancahuun. ¹¹Nocon Ifo yonoshoni shaniyamacahuun. Diospan

Yoshin Sharahuunshon unimacain yonoshosharacahuun. ¹²Upa Diosin mato shara huashoshquiai cuscan shinancahuun. Nanfo shinain unimacahuun. Ascan omitsiscafaia funayamacahuun. Upa Dios cuquin unuyamacahuun. ¹³Diospan yorafo yopai cuscan ato inancahuun. Futsafo pimasharacahuun. Pushu yopaifo maton pushu muran ato iquimacahuun. Ato cushusharacahuun.

¹⁴Mato omitsiscafaioan ato copiyamacahuun. Ato roayamacahuun. Asca huatama ato shara huacahuun. —Upa Diosin mia shara huairan, —ishon ato yoicahuun. ¹⁵Unimaifo ya unimacahuun. Uaicaifo ya uaicahuun. Omitsiscafaioan ato shinancahuun. ¹⁶Ahuu iquinan tananquima. Upa Diosin mato shinamapaiyai cuscan nanoris shinancahuun. Oinanmitsapaimisi iyamacahuun. Niaifo yasi rafucaquima. Ahuuomafo yari rafucahuun. —Un tapia cuscacai futsafoan tapiafomaran, —ishon anori shinanyamacahuun. Curafiayamacahuun.

¹⁷Mato chaca huafainfoan ato copiyamacahuun. Aton ointaiifi isharacahuun. ¹⁸Nantifi yorafo ya rafupaisharacahuun. Man asca shara huapaifaino futsan matofu isharapaiyamainocai matohuun nuama. ¹⁹Uhuun yoramishtichin, futsan mato chaca huafainton ato copiyamacahuun. Upa Diosin yoini,

“Mato chaca huafifin unfin ato onaintimaicai,”
 ishon Diosin yoini. Diosin chacafo ato onaintimashquiquin. Manca ato onaintimaima.

²⁰“Ato copitama nan mato noicasmaifo fonaincafoan ato piimacahuun. Nonmaincaifoan ato ayamacahuun. Man ascaiton oincani noco copimaran,”

icashu rafipainonfo. ²¹ Ascan futsafoan mato chaca huapaiyaiifoan marifi copiquiri ato chaca huayamacahuun. Chaca ifo huayamacahuun. Ascatama shara huafafaincahuun. Asca huaquin man chaca potatiro.

13 ¹Upa Diosin yononi cuscan manifoti anoaflo niaifofo catononfo. Ascan nantifi niaifo uhuapao yafi patasharifori nicacoincahuun. ²Tsoan ato nicacasmaquin Diosinri nicacasmaacani. Nan nicacasmaifoan ato onaintimashqui. ³Non isharashucai non niaifoqui musutiroma. Chaca huashufi non atoqui musutiroquin. Niaifoqui musushquinma isharacahuun. Man ascaiton mato chaca huatama matohuunoa yoisharanonfo. ⁴Niaifofin Upa Diosin oinmatifo cuscarafoquin mato shara huashcaquin. Ascafia chaca huaashu ratucahuun afocai cashman niaifoanma. Yorafo onaintimatiro. Nanfomin Diospan oinmatifo cuscarafoquin chaca huaifoan onaintimashcaquin. ⁵Asca mato yonoaifoan nicacoincahuun mato onaintimanonfoma. Maton nomuran isca huaquin shinannonfoma, —iOhushta! Upa Diosin yononi cuscan un aamaran, —ishon shinanshcaquima.

⁶Diospan oinmatifo cuscara mato shafatifi yonoshcaquin man isharanon. Ascacun mato pui yocaifoan ato inancahuun ahuunshon mato shara huashononfo. ⁷Man ato nifian cuscan inancahuun. Atohuunoa shinansharafain yoisharacahuun.

⁸Tsoa nifyamacahuun. Ascatama noinancahuun. Noinain unuyamacahuun. Nantifi non noiquin Upa Diosin yononi cuscacoin non huatiro. ⁹Noco yoiqui isca huani, —Maton ahuinmafo ya iyamacahuun. Ainfofori mato funuma furi iyamacahuun. Rutumitsapaiyamacahuun. Ahuara onuyamacahuun. Futsana

fipaiyamacahuun, —ishon nocu yononi. Ahuara futsafoi nocu yoini. —Non yorafo noiffin Upa Diosin nocu yononi cuscan non aicain, —ishon nocu yononi. ¹⁰Non futsafo noicoinschocai non ato chaca huatiroma. Ascan non nantifi noicoinschofin Diosin yononi cuscan non atiroquin.

¹¹Un mato yoiai cuscan acahuun. Nocon Ifo Jesús oti chaima. Non icoira huaquin tau huani chain. Oshapaimisi cuscara iyamacahuun. Oshapaicai non yonosharatiroma. Nanscarifiai shanicaquima. Jesús yonoshosharacahuun itisharashcaquin. ¹²Shafacuaino samamashta shafatiro. Nanscarifiai man chaca huai cuscan cuyocuanaino natianri nocon Ifo man oti chaimaquin. Ascashu faquish muran ica shinantsa ayamacahuun. Chaca shatucoincahuun. Jesús ica cuscan marifi shafacafi icahuun. Chaca huaquima.

¹³Isharacoincahuun. Shafatan non oinsharatiro pacushquima. Nanscarifi aquin Jesús tanashu non isharatiro chaca huatama. Ascan futsafo monoaifo muran atoqui foyamacahuun chaca huashquima. Chaca futsa futsatapafo huayamacahuun. Paunyamacahuun. Ascatari maton ahuinma chotayamacahuun. Ainfofoanri maton funuma chotamayamacahuun. Ahuara chaca futsafo shinanyamacahuun. Fochishmanantananyamacahuun sinashquima. Futsa shutipaimisi iyamacahuun. ¹⁴Ascatama nocon Ifo Jesucristo icai cuscan acahuun. Ahuarafoan mato chaca huamatiro afohuunoa shinanyamacahuun chaca huashcaquima.

Jesús icoira huaa futsafo tsain chaca huayamacahuun

14 ¹Tsain futsari un mato yoi. Tsoan Jesús Ifo huafashocai ahuun tsain shara atirifi tapisharataima matofu ichanainton, —iAicho! No fu ichananhuun,

—huacahuun. Man shinain cuscan shinanyamaiton afu fochishmanantananyamacahuun. Aqui tsain chaca huayamacahuun. ²Mato muran ishon futsan yoitiro isca huaquin, —Un Jesús icoingra huashon nantifi tushu shara un pitiroran, —ishon yoitiro. Ascan futsan yoiquin isca huatiro, —Unfin Jesús icoingra huaquin uncai nami pitriroma. Yenosifin un pitiroquin, —ishon yoitiroquin. ³Man nantifi pitiroquin a yonosi pitirohuunoa shinanchacayamacahuun. Nanscarifi aquin man yonosi pimisiquin a nami pimisihuunoa isca huaquin shinanyamacahuun, —Atofin chaca huaiquin, —ishon yoyiamacahuun. Upa Diosin nantifi nanscarafosi nocon imani non ahuun facufo non inon. Ascacun futsaqui tsain chaca huayamacahuun.

⁴Jesús icoingra huafocai maton oinmatima. Upa Dios fustina. Ascacun atoqui tsain chaca huayamacahuun. Upa Diosin ato tapimatiro cayacafi shinanyamaraquimain amaqirí shinancaniquin. Afin ato tapimatiroquin isharanonfo.

⁵—Moisés nocon caifo yononi rato shafatamain non ichanantiroquin Upa Diosihuunoa shinanshquin, —atirififain Jesús icoingra huaoan anori shinancaní. Ascafia atirififain anorisi shinancanima. Shafatifi ichanango Upahuunoa shinanshcaquin. Ascacun nantifiton maton nomuran man shinain cuscan acahuun. ⁶Atirifoan shinanco rato shafatamain ichananti shafa shara itiroquin Upa Diosihuunoa shinanshquin. Nanfoanri nocon Ifon Jesús shara huapaicani. Ascan futsafoancai anori shinancanima. —Shafatifi nanscarafosi non Diosihuunoa shinantiro. Ascacun nan ratoran shafatafin non nami pitiroquin. iAicho! Upa Diosin min nocon nami inanquin non pinon, —ishon shinantirofo. Nanfoanrifi nocon Ifo Jesús

shara huapaicani. Ascashon futsafoan nami piyamaifoan yonofosi pitiro. Nanfoanri nocon Ifo Jesús, —iAicho! —huatirofo. Nan rafutan Dios shinansharapaicani.

⁷⁻⁸Non niyoshocai nofin non apaiyai cuscan fusti non shinantiroma. Upa Diosin nocon amapaiyai cuscan non shinantiyo. Nonfin ahuunafquin. Nanfin nocon Ifonquin. Noncái nofin catontiroma rato shafatamain non naicain. Ascan niyoshon iyamarai non naitianri non nocon Ifonna. Niyoshon non nocon Ifo tanasharapai nocoqui unimanon. Non naitian non nocon Ifo shinantiro non ahuunacoin.

⁹Criston nocon nashoni. Maia murannoashu funicainshquin. Ascan natian man nia. Non niano yafi non nano nocon Ifo iishquin. ¹⁰¿Ahuiscaín icoingra huaa futsan ahuun ifo man ipaiyai chaca huayamarauin shara huairan huashquin? ¿Ahuiscaín futsahuunoa man shinanchacamun? —Aacai ahuamaran, —ishon man shinan. Ointiaquimayamacahuun nantifi non chipo Dios icano aqui noocoicaicain. Nantian nocon yoishquin nonmain shara huayamarauin non chaca huamisiquin. ¹¹Nannori Diosin tsain Isaías cununi isca huaquin,

“Iconcoin un niaquin. Iconcoinri nantififain manifoanna anoafu uqui nocoshcani ua ratoconun mai chachishon yoishcani, ‘Diosin, icon min Diosinran,’ ishon nantififain ua yoishcaniquin.”

¹²Ascan nantififain non Upa Diosin ointaifi non amisi cuscan nocon yoifain non shinanmisi cuscari nocon yoipacushquin.

Futsafo chaca huamayamacahuun

¹³Ascacun afanan icoingra huafohuunoa tsain chaca huayamacahuun. Noncái

ahua chaca huaima noco oincashon arifi
chaca huanonfoma.

¹⁴Jesús uhuun Ifocun un mato
yoisharapai. Mun icoindra huacoinna
nantifi yonosharafo non nami sharari
non picucay noco chaca huaima.
Ascafia tsoan ahuun nomuran
shinanquin isca huai,—Un na tushu
piquin un chaca huatiroran,—ishon
shinanquin atocai tushu pitiroma.—Un
pishon uhuun nomuranshon un
shinanchacatiro,—ishon yoitiro. ¹⁵Mi
futan Jesús icoindra huaton ointaifi a
nami min pitiroma piyamacahuun
ahuun nomuran shinanchacanonma. A
noishocai min ahuun ointaifi min
pitiroma. Nocon Ifon Cristo
ahuunoashuri nani. Ascan a pitiroma
piquin min futsa shinanchacamatiro.
Ascacun ahuun ointaifi piyamacahuun
Jesús cachiquiri huanonma
funoshquima.

¹⁶Man acai cuscan man shinanraca
sharacoin. Ascan futsafoan oinquin
shinanchacanonfoma shaturiscacahuun
matoqui shinanchacanonfoma. ¹⁷Ascano
shinancapon. Non pifain aqui ayafain
non huatocai nocon nomuran noco
shinansharamatiroma. Upa Diosin noco
iquinano non ahuun Yoshin
Sharahuunshon Jesús cuscara isharacain
nocon ointi non unimacointiro. ¹⁸Nocon
Ifo Jesús non yonoshosharaino Upa
Diosin noocoqui fasi unimasharatiro.
Yorafoanri nocohuunoa
shinansharatirofo.

¹⁹Ascacun icoindra huaa futsafo ya
icoindsharacahuun. Jesushuunoa
shinanmatanancahuun a cuscara shara
iishcaquin. ²⁰Icoindra huaa futsafoan
tushu futsa piyamaiton aton ointaifi a
tushu piyamacahuun. Diosin yoini
nantifi tushu sharafiacun aton ointaifi
piyamacahuun. Man piquin aton
nomuran man shinanchacamatiroquin.

Ascaquin man ato pacumatiroquin
afanan Jesús tananofoma. ²¹Ascan
icoindra huaa futsafoan shinanquin isca
huaquin,—Diosin yononi cuscan un
nami pitiroma. Un ahuara pauri
ayatiromaran,—ishon shinanquin
shatucahuun ato pacumashquima.
Ahuaraofoan ato pacumatiro
shatucahuun pacunonfoma. ²²Ascano
afohuunoa man icoindra huaa cuscan
marusu maton nomuran shinancahuun.
Upa Diosin fustifin man yoitiroquin.
Man man tapian nantifi man acai
cuscan nanfo sharacoin. Ascafia
atirifoan tapisharataicanima. Ascano
pifain ayafain huakin mato nomuran
man shinantiro man chaca huaa cuscan.
Ascafia shatucoianshufin maton
nomuran man unimatiroquin.

²³Ascashon tsoan ahuun nomuran
shinanquin isca huai,—Afo piquiraca
un chaca huacat, —anori
shinanfiaquin piriaquin chaca huatiro.
Tapishoma shara iyamarai chacafiacun
un pia. Ahuara futsan tapishoma
aquiraca,—Un chaca huacat, —ishon
shinantiro. Tapishoma aaqui chaca
huai.

**Mafin man apaiyai cuscan huatama futsan
apaiyai cuscan huashocahuun**

15 ¹⁻²Non icoindra huaitin Diosin
noco yoini non nantifi tushu
pitiro. Ascan icoindra huafoma non ato
funaiquimashta yositiro atofu
fochishmanantanantama. Nofin non
apaiyai cuscan fusti non atiroma. Nan
icoindra huaa futsafohuuri non
ramapaitiro shinansharonon nocon Ifo
non ato tanamasharatiro. ³Shinancapon.
Nocon Ifon Cristo afin apaiyai cuscan
fusti shinanpaonima. Ascano ahuunoa
Diospan tsain cunuquin isca huani,
—Upan, un mia nicacoin. Ascan mia
chaca huapaicaquin uari roacaniran,

—ishon cununi. ⁴Nantifi Diosin tsain cunupacuni noco tapimashquin. Cununiri non icoindra huashon ahuara chaca finonfiaquin non tunucoinnon. Ahuun tsainhuunshon nocon ointi non fupi huamashon non tapitiro nocon Ifo fu nai muran chipo afu ipashquin afanan ahuara chaca finonshquima. ⁵Upa Diosin non chaca finoainton noco mutsismatiro nocon ointi unimacain nocon Ifon Jesucristo man tanasharaino mato nannorisi shinanmatiro. ⁶Ascano nannorisi shinanquifin non nocon Ifo Jesucristo ahuun Apa nan oi fusti nicatsa non ahuunoa yoisharatiro.

**Nan tsain shara Jesucristohuunoa
Israelifoma yoini**

⁷Criston nocoqui unimaquin noco iquina ahuun yorafo non inon. Ascan marifi futsafo ya yorahuatanancahuun. Man ascaino Diosihuunoa futsafoan shinansharatiro. ⁸Un mato yoicain Jesucristo mai ano oni Israelifoan aton oinmati cuscara iquiyoi. Ascano Upa Diosin nocon shunifo yoini cuscan iconcoincun non tapitiro. ⁹Mani futsafoanri icoindra huashon yoishcani isca huaquin, —iAicho! Upa Diosin nocohuun ramapaiquin ahuun Furun nocoqui nichini. Noco numanon. Upa Dios shararan, —ishon mani futsanfoan yoishcani. Nannori Diosin tsain cununi isca huaquin,

“Ascan un mani futsafo mihuunoa un yoisharashquin. iAicho Dios shararan!” ishon un mihuunoa ato yoishquin. ‘Un mihuunoashu fanainsharashquiran,’” ishon cununi. ¹⁰Afanan Diosin tsain cunuquin isca huani, “Mani futsafoan nan Israelifo ya unimatanancahuun. Marifi man atofu Diospan yora iishquicai,” ishon cununi. ¹¹Afanan cununi isca huaquin,

“Mani futsanfoan, nocon Ifohuunoa yoisharacahuun. Nantifi manifoti anoashu nanscasi aqui fanain ishocahuun,”

ishon cununi. ¹²Isaías arifi isca huaquin cununi,

“Nocon shuni Isaí ahuun funapan manifoti ato iquishquin. Shinanquin isca huashquin, ‘Nan fusti nocon Numamisi inonran,’ ishon yoishquicani,”

ishon Isaías cununi.

¹³Ascan Upa Diosin fustiton maton nomuran imasharafain mato unimamatiro man afu ipanon icoindra huashu. Ascano ahuun Yoshin Sharapan ahuun curushhuunshon noco yoini cuscan nantifi noco ashonon, ishon man fasi icoindra huapainon.

¹⁴Uhuun yoramishtichin, un icoindra huai un oianfin man noinantanancoianquin. Jesushuunoari tapishara futsafori ato tapimashquin.

¹⁵⁻¹⁶Ascacun un ranotama afanan afohuunoa un mato shinansharamana. Diosin uhuun ramapaiquin ua catonni Jesucristo ahuun oinmati un inon nan tsain shara ahuunoa un mato tapimanon. Ascan ua nichini un mato Jesús icoindra huamanon. Diospan Yoshin Sharahuunshon maton chaca man shatua a cuscara shara iishquin. Ascano Upa Diosin matoqui unimacoinkui ahuun yorafo mato imai.

¹⁷Ascacun un fasi unimaicai nocon Ifo Jesucristo ua catonni Upa Dios un yonoshonon ahuunoa uhuun caifomafori un ato yoinon. ¹⁸Criston ahuun curushu ua inan uhuun caifomafoan Diosin tsain nicacoinon. Un ato yoimisi cuscan Upa Dios nicacoinmisifo. Un Cristo yonoshona cuscan fusti un tapia. Futsafoan Criston yonoshonahuunoa uncai tapiama.

¹⁹Ahuun Yoshin Sharapan ahuun

curushhuunshon tsoan oinyomisima cuscara un ato isma. Ascan un nan maitio Jerusalén anoshon yoifainquin Iliria ano un nantifi nan tsain shara Jesucristohuunoa yoiquin rupian. ²⁰Uncai futsan Jesushuunoa yoimisi anori un capaimisima. Tsoan Jesushuunoa nicayomisima anorifi un capaimisi ato tapimashquin. ²¹Nannori Isaías Diospan tsain cununi isca huaquin,
 “Tsoan ahuunoa nicayomisima nicacaquin tapinonfo,” ishon cununi.

Pablonun Roma ano cashquin shinanni

²²Ascacun un mato ari capaimisi. Ascafia un mato oin capaifiain un camisima. Ahuara futsan finoanshu un nituri niturimisi. ²³Ascafia natian mun cashcu futsa ato Jesushuunoa yoiqui anaitian. Ascan mun itishara mato ari cashquin. Un fari ichapa camisima. Nantishon tapiquin un mato ari capaimisi. ²⁴Un España ari caquin mato ano rutiacashu un matofu tsainshquin. Non yoinonansharanon. Mato anoashu un caiton ua tushu inanshcaquin un España ari nocosharanon.

²⁵Ascafia natian un Jerusalén ano cayoicai. Jesús icoinra huaoan ua nichini icoinra huaa futsafo un ato pui inanon. ²⁶Macedonia yafi Acaya anoafu unimacain icoinra huaa ahuuomafo Jerusalén anoa ato pui inanpainifo. ²⁷Unimacaquin ato inanpaiquin. Yoinifo isca huaquin, —Jerusalén anoa Jesushuunoa yoimisifoan nocou ni chin. Noco nichiamacun na tsain shara non nicacuanama. Ascacun nan non aya cuscan nofiri non ato inanpai ato shara huaquin, —ishon yoiaifoan. ²⁸Ascan un ato inanfaini un España ari caquin un mato oinfaini cai. ²⁹Mun

tapián un mato ano nocoshon nocon Ifohuunshon un mato yoisharashqui maton nomuran man unimanon.

³⁰Tsain futsari un mato yoipai. Man nocon Ifo Jesucristo noishon ahuun Yoshin Sharahuunshon uari noiquin ua Upa Dios cufishocahuun un yonosharashonon ahuaton ua nitun huanonma. ³¹Ua cufishocapun Upa Diosin ua cushunon Judea anoa icoinra huamafoan ua ahuusca huanonfoma. Ua cufishocahuun un icoinra huafó Jerusalén anoafu pui un ato inainno unimacoincái finonfo. ³²Nan ato inanquin anaitian Upa Diosin ua nichiano un unimacoin matoqui nocotiro. Ascashu non yoinonansharatiro nocon ointi non unimatananon. ³³Diosin nocon ointi noco shara huashomisi matofu isharanon. Nanscarari ipainon.

Pablon ato tsain shara fomani

16 ¹Nocon yorahuan Febe Cencrea anoashu matoqui nococun shara huacahuun. Nan ainfoan nocon Ifo tanasharacoianquin. Cencrea anoa icoinra huaafó shara huamisiquin. Yorafo shara huamisiquin. Uari shara huamisi. Fasi nocon Ifohuunoashu yonosharamisi. Ascacun yopai cuscan ashocahuun.

³ Priscila futan Aquila u futan Jesucristo yonoshosharamisifo. Ua ato yoisharashocahuun. ⁴Futsafoan ua rutupaiyainfoan nan rafutan ua numaifoan ato rutuqui rashquinifo. Uhuun caifomari Jesús icoinra huaoan ichanancashon yoimisifo isca huaquin, —Priscila yafi Aquila non fasi atohuun noiran, —ishon yoimisifo.

⁵ Ato pushu ano ichananshori ua ato yoisharashocahuun.

- Uhuun yorashta Epeneto ua
yoishocahuun. Nantofin Asia
anoshon Jesús icoindr auaquin
tau huani.
- ⁶ María mato yonosharashomisiri ua
yoishocahuun.
- ⁷ Uhuun yoran rafuri Andrónico yafi
Junias ua yoishocahuun. Nan
rafu ufu cunu muran iquinifo.
Jesús fu rafumisifo
atohuunoa yoisharamisifo. Un
Jesucristo icoindr huataima
nan rafutan icoindr huaquin
tau huanifo.
- ⁸ Ampliatohuun un noi. Arifi nocon
Ifon catonni. Ua
yoisharashocahuun.
- ⁹ Urbano u futan Jesús yonoshomisi
nanrifi ua yoisharashocahuun
uhuun yorashta Estaquiri ua
yoisharashocahuun.
- ¹⁰ Apelles fasi nocofunu shara. Upa
Diosin aqui unimai. Atori Jesús
yonoshosharamisi. Nanrifi ua
yoisharashocahuun.
- Aristóbulo yafi ahuun yorafori ua
yoisharashocahuun.
- ¹¹ Uhuun yorashta Herodión ua
yoisharashocahuun.
- Narciso yafi ahuun yorafoan
nocon Ifo icoindr huaaf aforifi
ua yoisharashocahuun.
- ¹² Trifena yafi Trifosa non nocon
yorashta Pérsida ua
yoisharashocahuun. Nan
ainfofoan nocon Ifo fasi
yonosharashomisifo.
- ¹³ Nocon Ifoan Ruforifi catonni. Ahua
uhuun uhuacoin cuscara. Ua
cushusharamisi. Nan rafuri ua
yoisharashocahuun.
- ¹⁴ Asíncrito non Flegonte non Hermes
non Patrobas non Hermas non
icoindr huaaf futsafo atofu icafo
ua yoisharashocahuun.
- ¹⁵ Filólogo non Julia non Nero yafi
ahuun poi non Olimpas non
nantifi icoindr huaaf futsafo
atofu icafori ua
yoishosharacahuun.
- ¹⁶ Nantifi noinancanashu
munininantanancahuun.
Nantifi Jesús icoindr huafoan
ichananshon maifoti anoashon
mato yoisharanonfo.
- ¹⁷ Uhuun yoramishtichin oinfain. Mato
fu ichananmisifo futsafoan mato
shinanchacampai afanan Jesushuunoa
man nannorisi shinanonma. Non mato
cayacafi tapima cuscan nanfoan
anorima mato tapimapai. Mato
amaquiri shinanmapai afanan icoindr
man huanonma. Atomaqui icaahuun.
- ¹⁸ Afocancai nocon Ifo Cristohuunshon
yonomisifoma. Nanfoan ahuara
fipaiyaiifo fustisi shinanfo. Diosin tsain
tapisharafoma aton tsain fustihuunshon
ato parapaicani ato amaquiri
shinanmashcaquin. ¹⁹ Nantifiton nicafo
man nocon Ifo tanasharacoincun. Asca
un matoqui unimacoinni. Ahuara
sharafihuunoa tapicoincahuun.
Manmain ahuara chacahuunoa
tapiyamapainon. Afohuunoa
shinanyamacahuun.
- ²⁰ Upa Diosin nocon ointi isharamai
cuscan nanton samamashta
matomaquinoa Satanás anaiticoin mato
afanan ahuusca huanonma. Nocon Ifo
Jesús mato shara huashopainon.
- ²¹ Timoteo un futan Jesús
yonoshomisiton mato yoisharapai. Lucio
non Jasón non Sosípater nanfo uhuun
yorafoan mato yoisharacani.
- ²² Unquian, Tercio, un natian Pablo
cunushoni. Urifi nocon Ifohuunshon
mato yoisharapai.
- ²³ Un Gayo pushu muran icun ua
cushumisi. Icoindr huaaf futsafori ahuun
pushu muran ichanamisifo. Afoanri

mato yoisharafo. Erasto yorafoan aton pui cushushomisi nocon yorahuan Cuartori mato yoisharapai.

Ahuun unutaqui Dioshuunoa yoisharani

²⁴Nocon Ifo Jesucristo matohuun ramapai. Nanscari ipainon. ²⁵⁻²⁶Upan Diosin mato cushusharanon. Un Jesushuunoa mato yoimisi cuscan afi ahuun curushu mato inantiro man tanasharanon. Ipaoni tsoancai Jesucristohuunoa tapiyopaonifoma. Natian nantififain tapitirofo Upa

Diosin nan nipanacaton noco nichini Furun Jesucristohuunoa non yoinon. Ishquiai cuscan Upa Diosin ato yononi cuscan nannoricoin cununifo. Manifoannatifoan Jesús icoira huafain nicasharanonfo. ²⁷Nocon Diosin fustitofin nantifi tapicoianquin. Nocon Ifon Jesucristohuunshon nantififain ahuunoa yoisharapacunonfo. Nanscasi ipanon. Amen. Nanti uhuun tsain unutaqui un mato yoi.

Pablo